

ASO LULU, 25 IANUARI 2023

Na nofoia e le Fofoga Fetalai le Nofoa i le itula e 9:26 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

E tumau lava a tatou fuafuaga faagasolo e ala i le tatou galuega, peitai, e ao lava ona ta'ilau se gagana a le Nofoa e faatupu matagi a o fōina le lau a le tautai, viia le alofa o le Atua i lenei taeao, aua sa siosiomia lo outou soifua ma so matou ola i mailei a seoli. Sa o tatou malaga faatasi foi ma le matasele a le oti, peitai, o le Atua na o tatou sofa'i ai le 'au, o Ia foi na o tatou osopuna ai le pa, o le Atua o lo o fusia ai i tatou i le malosi, ua Ia faalaulelei foi o tatou ala. Tau ia ina faafofoga le Atua i le tatou taulaga siitia i lenei taeao, ina ia to ai pea manu mo le alofaiva o le paia o le Palemene. Faamalo le soifua manuia ma le lagi e mama i lenei taeao fou.

O paia lava o le Maota, e le mafai ona aveesea, o lea ua pepe manu o le faga ma ua sasaa foi tino o manuata. Ei ai foi le talitonuga o ataata manuia ia o le tatou galuega i lenei aso. Manuia le usugafono a le tatou Maota, manuia foi le tapuaiga a si o tatou atunuu.

TUUIINA ATU O PEPA

Na tolaulauina e le Failautusi i le Fono Aoaofaitulafono le faasologa o Pepa e tusa ai ma T.T.49(2).

1. P.P.2022/2023 Nu.144, Iloiloga o Tulaga Tau Aiga a Samoa, Lipoti Faaiu 25/22, Komisi o le Toefuataiga o Tulafono a Samoa.
2. P.P.2022/2023 Nu.145, Lipoti o le Usugafono i le Fonotaga Lona 51 a Fofoga Fetalai ma Failautusi o Palemene na usua i Melepone, Ausetalia i le aso 04-08 Iulai 2022;
3. P.P.2022/2023 Nu.146, Lipoti o le Usugafono a Samoa i le Fonotaga Lona 65 a le Faalapotopotoga Faa-Palemene a Malo o le Taupulega, na usua i Kanata i le aso 20-26 Aokuso, 2022.

Ma le faaaloalo lau Afioga.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2022/2023 – felafolafoaiga faaaauu i luga o le
faitauga faalua – Aso 6**

FOFOGA FETALAI: E tolopo Galuega a le Fono Aoa o i le po anapo ua maea ona saunoa le Afioga i le Minisita o Tupe e tusa ai ma mataupu na laga i lauga a sui usufono.

Ia ma o le taimi lenei, ua oo mai i lau Afioga i le Minisita o le Soifua Maloloina.

Tulai maia lau Afoga i le Minisita aua foi nisi o mataupu na laga i saunoaga a sui usufono mamalu o le Palemene. Ma lou agaga faaloalo.

Afioga Hon VALASI LUAPITOFANUA TOOGAMAGA TAFITO SELESELE (Minisita o le Soifua Maloloina): Ona o le avanoa taua ua tuuina mai i lenei Matagaluega o le Soifua Maloloina, ona i ai lea o le manatu e momoli foi le agaga faafetai o lea ua e siitia le taulaga molia i lenei taeao fou e talosia galuega a le Maota, aemaise o tapuaiga a Samoa, malo faafetai. I le matau lava lea i lau anavatau tauave pea, ia e le selu atu i le tofa i lou manatua pea o le Atua i o tatou faiva aemaise o le faagasologa o a tatou galuega. I nisi Palemene ma nisi atunuu tetele, e leai ni tu ma aga faapenei, ae o Samoa lava ia, o lo o fesili pea i le Atua i so o se mea, i le amataga aemaise le taunuuga.

Faafetai i le alafai mai i faguga lelei o lenei Maota mamalu i sui usufono mamalu uma e le gata i le Sui Palemia ma le Kapeneta, Minisita Lagolago, ae le gata foi i lea o le Sui Taitai o le Itu Agai, ia ma le mamalu o alii ma tamaitai sui usufono i lena Itu. E le gata i lea o lau Afioga i le Fofoga Fetalai ma le Sui Fofoga Fetalai.

O lenei taeao e le mafai le mafai ona alulua le lauga a le Matagaluega, aua e masani lava le Minisita i le faapai atu i ona itutino uma. Ae le i sii le sa i tai o le Matagaluega, lua Afioga i Minisita Lagolago, Faasaleleaga 4 o le toe Ulutaia o le Maota, aemaise foi Gagai fomauga 2, le mamalu ia te oulula sui usufono, ia tapuai maia ma le manuia, tatalo ma faauu mai le lua uso i le uu manogi ma le uu mamana ina ia faagaganaina, aua Samoa.

Lau Afioga i le Ofisa Sili o Pulega, le Laau na Fausia Aiono Alec Ekeroma aemaise Ofisa Sili Lagolago, Tagaloa ma Glenn o Fomai, aemaise foi le tamaitai loia o le Matagaluega, ia tapuai maia. O outou o fai ma sui o le Matagaluega Aoa, e i ai se taimi oo atu i ai se tala, ae tapuai mai i le tatou lauga.

E le faagaloina nisi vaega o lo o i lalo o le Portfolio a le Minisita, le Faalapotopotoga Faamamatoto po o Fatugao, le Susuga i le Taitaifono ma le Komiti Faafoe, aemaise le Susuga i le Ofisa Sili, le Susuga ia Mulipola Hazelman ma le aufaigaluega, tapuai maia, e le faagalo outou.

E le gata i lea o le Susuga i le Alii Pule o le tatou Iiunivesite o le OUM po o le Oceania University of Medicine, le Susuga i le Fomai ia Toleafoa Manufalealili, o le susuga i lana aufaigaluega, aemaise o le laumua o le Iunivesite, ia tapuai maia.

Falemai tumaoti o itumalo e fia o Samoa, i itumalo i tua i nuu ma alaafaga, ia o lo'u tu atu i le lauga e momoli le sao o le Matagaluega, ae alo pea i a outou galuega, aua tou te nofonofa ma faalogologo mai a ia alo i le galuega.

Ona ou afe ane lea i si ou itumalo, tau lava ina ou pai atu lou itumalo pele, aua o outou na faatietieina au i le Maota lenei, o le ala lea o le tulai atu. Ia na ona ou faapai atu i le afio o Aiga o Mavaega, le falefa o Sataua ma Lealuga, ae tainane le afio o Luapitofanua ma Ufagalilo, le Maopu ia Toleafoa ma Tagaloa le alii o nuu, Utuutu ma Faitau, Aumua ma Maninoa ma Fagasa. Le lavelave o so o se itumalo, aemaise o lupe faalele ma taulaga tagata a lo tatou itumalo o lo o nopiai i so o se tafa, ia tatalo ma faamanuia mai.

Lau Afioa i le Fofoga Fetalai ma le mamalu o le Maota, e le mafai ona alulua lau lauga ou te le i faafetai i le tausiga o le Maota lenei i le mamalu ma le uiga ese foi. E pei lava ona ou fai atu e leai se Palemene o le lalolagi, le mamalu o lona faalagiga aemaise o le Agai a le tatou Maota, i lona siufofoga e faatupuina pea e le Atua le matagofie ma le malie, aua le amatalia o Fonotaga i aso taitasi, e matau pea.

Le susuga i le alii Satini i le amoina o le mace ma le mamalu, malo faafetai, faafetai mo tiute ma faiva. E le gata i lea o le aufaigaluega i totonu o le Maota, le Failautusi ma le Ofisa, e maitauina lo outou gapatia. Faafetai le tautua i le Fofoga Fetalai ma le Sui Fofoga Fetalai, aemaise o le Maota o Samoa. E le gata i lea o le Minisita e fitoitonu i ai le Maota Fono.

Faafetai tele i Ofisa Sili o Pulega o Matagaluega, i so o se Ofisa Sili o Pulega ma so o se Matagaluega o lo o taulamua i le taitaiina o Matagaluega aua le lelei o Samoa. Malo faafetai i la outou tapuaiga. O le tatou lauga lava lea o le a amata, ia tapuai maia le tatou Maota.

Ou te talitonu foi o lenei lauga, e leai lava se e ono faalavelave, aua o le lauga o le a faamalieina la outou faafofoga. A i ai se mea e fia faalavelave ai se tasi ona tusi mai lea ma faamau i lalo o le pepa ma tuuina mai.

Ou te talitonu o Samoa ua uma ona tofi, o le Maota ua soo ona taiao, o le sami foi e le soona fagotalia e se tautai, aua o paia, o sa ma faiga, o lea lava ua maea tatanu ona magalafu, ua maea fusifusi ona fausa, ua uma foi ona aisa ona i'a se i tulou. Ua taoto alaoa ona upu popo, e amata mai lava i le malama i Saua, seia paia le ataata o le lagoto i le Alataua i le fatu le gae e tupu, ae tainane le falalesee o faleupolu.

Ee ia i toaga mafana, taoto faagalulu e le fati ma ufiufi faafaleseu o tupu paia ia, aua o paia e le soona fagota sagolegole i ai se tasi, e leai foi se vave e pulunofoina le oloagiga, e leai lava se poto e na te foua le

apulutamuliauma o Samoa ua faatusa i le i'a ivililo e auaugata, e faigata foi ona faiva.

Lau Afioga i le Fofoga Fetalai, ou te fia pai atu i le tapuaiaga a Le Ao Mamalu o le Malo. Avea foi lenei avanoa ou te faafetai atu ai lau Afioga ma le Masiofo i le faamanuiaga na tuuina mai mo le Kerisimasi ma le tausaga fou, faafetai tele le amanaia ma le aloaia e ala i le lua tusi faamanuia mai, ua manuia ai faiva. E le faagaloina le lua tapuaiga, faamalo faafetai.

E le gata foi i lea o le Sui o le Fono a Sui Tofia ma le faamanuiaga ma le faletua, malo faafetai mo faamanuiaga e pei ona i ai lenei tausaga.

Ona oo mai lea i lau Afioga i le Tamaitai Palemia talofa, lau Afioga i le Fofoga Fetalai, sa tuuina mai foi lana faamanuiaga, aemaise foi saafiafiaga mo le Kerisimasi ma le tausaga fou. Afai o e faafofoga mai, momoli atu e le savili ma le matagi ma le saumalu i lou finagalo faamanuiaga a le Minisita o le Soifua Maloloina ma lana Matagaluega aemaise Samoa. Ia manuia lau siiga gasegase. Matou tatolo pea, ia e toe taliu manuia mai i le tatou atunuu aua ou faiva ma tiute fai. Afioga i Minisita, ia, e faapena se lagona.

Ona oo mai lea i le Sui Palemia, le mamalu o le Kapeneta, malo mo faamanuiaga o le Kerisimasi, e leai lava se tasi o outou e le i i ai se faamanuiaga momoli mai. Ae le mafai ona ou folomolemoleina, leaga e faigata a outou faamanuiaga. Malo faafetai mo tiute ma faiva, ae le gata i lea o Minisita Lagolago uma.

Faafetai i le Afioga i le Fofoga Fetalai, Sui Fofoga Fetalai ma le Maota, Sui Taitai ma sui usufono mamalu uma o lenei Itu. Malo usufono.

A o faafofoga mai le Faamasino Sili ma le Vaega o Faamasinoga, e le gata foi i lea o le Peresetene o Fanua ma Suafa, faamalo faafetai tapuai mai. Aemaise Alii ma Tamaitai Faamasino, malo fai o le faiva.

Ou te talitonu e le mafai le mafai ona alulua o lo o faafofoga Samoa i ona aotelega. Tama ma Aiga, Aiga ma Tama, Ituau ma Alataua, Aiga i le Tai ma le Vaa o Fonoti. Ae le gata i lea o le usoga a Tumua ma Pule. O le aotelega lenei o Samoa mai lava i ona tumutumu seia oo lava i se aupito iti, malo faafetai.

E le faagaloina o tatou uso i Sasae pei ona i ai le tatou faalagiga ua i ai nei ua atoa Samoa. Malo tapuai, i le afio o Sua ma Vaifanua, Fofoga ma Aitulagi, Ituau ma Alataua, Saole ma Saleaamua ma le Launiu Saelua, Faatuiolemotu ma le Faleagafulu, upu ia te Oe le Manuatele ma le Laau na Amotasi. E le gata foi i lea o le tapuaiga a lau Afioga i le Kovana Sili ma le Lutena Kovana, Maota e lua ma faauluuluga, le Fofoga Fetalai ma le Peresetene o le Senate, e le gata foi i lea o lona Faamasino Sili ma le Ofisa o Faamasinoga.

Faamuli sau tala i le aufaigaluega totofi a le Atua i suli vaaia o le Atua i Taitai e fia o Ekalesia e fia, ae a le aufaigaluega galulue i le tauasuina o le

vai o le ola o lo o outou faamutiaagiagi i paeaiga ma alaalfaga e fia o Samoa aua lava se manuia o Samoa. Malo tatalo, faafetai le fai taulaga faafetai i taulaga molia mo le tatou Palemene ua manuia ai ona faiva.

Ona ou faapea lea, e i ai se taimi e oo atu i nisi o kamupani ma pisinisi sa faimeaalofa mai i le Minisita o le Soifua Maloloina a o le i taina le logo o le Kerisimasi, oka, e ese le matagofie. Afai o outou faafofoga mai, o le a ou le tolaulauina, ae taua le tou faafofoga mai i le avatu o se faafetai, malo faafetai mo meaalofa. O hampers, o fagu malosi, o fagu uaina, o so o se mea. Faafetai tele. Aemaise la'u Matagaluega e pele, e le gata ina matou galulue vavalalata ae sa faimeaalofa mai foi i le latou Minisita. Faafetai. Ia faamanuia le Atua. E le gata i lea o nisi o faletalimalo na molimoli mai o latou alofaaga. Ma e tau atu, a i ai se Minisita po o se sui usufono e fia maua se fagu, oka, aua foi o au ou te le inu i ia mea o uaina, o lo o molimau Olo ia pei lava o Olo e laki ai i le tele o taimi.

Lau Afioa i le Fofoga Fetalai, e le faagaloina le tapuaiga a aiga o lo o faafofoga mai. Nai ou aiga e, ua leva ona outou fai mai po o le a le mea ua ou toe fia faipule ai, ae aua ne i galo ia outou, o le manaoga lea o le Atua, ia ou toe sau i le Maota. E le o se loto i ina, o le tofiga a le Atua e faapena. Tapuai maia lo outou mamalu i Niu Sila, Ausetalia, Amerika, Amerika Samoa, so o se tafa, faafetai mo a outou faamanuiaga na aumai i le Kerisimasi, ia saga fai ai pea la outou amio o le molimoli mai o meaalofa. Afai ua faamalieina la outou faafofoga i so o se galuega, ia faafetai.

Lau Afioa i le Fofoga Fetalai, e le o lavea le Matagaluega i le Tala o le Tupe Faaopopo, ae le mafai lau amio ma lau tu, e le mafai ona ou faatamala i mea ua laga e sui usufono, leaga o sui usufono mamalu. O lou loto ma lou agaga e pei o le eleele le malie i vai i le fia faalogo, le momoo ina ia faifaipea le fautua mai. E ese lou fiafia i le tuualalo a sui usufono mamalu. Aua o le tuualalo, pe faitio po o le a lava, o i ina e te aoga ai mo le agai i luma, ae a amanaia la, e ese le taua. Lau Afioa i le Fofoga Fetalai ma le mamalu o le Maota, na amata loa ona ou lauga ou vaai i le uati, ae ou te iloa o le afa aso atoa o le a taumafai ai leaga e le o se tamai Matagaluega. O le Matagaluega o lo o vaaia e le Minisita, o le Matagaluega o le Soifua Maloloina, e le gata i lea o le Faamamatoto po o le NKF, National Kidney Foundation aemaise le Iunivesite. Talu lava ona lauga mai sui usufono, e leai ma se isi na te afea le Iunivesite, ae tasi lea portfolio a le Minisita. O le Iunivesite na faavae i le 2001 i le Act na pasia e le Palemene. Sa ou saofai ai i le taimi lena i le 2001, ma sa pasia ai le Iunivesite lena. E ui la ina leai se isi na te afea, e tau lava ina ou pai i nai mea taua ia, o lo o pule ai le Susuga ia Toleafoa Viali. E i ai le tamaitai Amerika o lona suafa o Daffy Gordts. Masalo e i ai nisi o outou. O si tamaitai milionea lea na faavaeina le Iunivesite lea. Ma mo le tou silafia, o lo o totogi uma mai lava e le tamaitai lea totogi o Toleafoa ma ana Ofisa o le Iunivesite. O le aofai o le Iunivesite o lo o i ai i le taimi nei tamaiti Samoa, e toa-19. O le toa-3 ua

uma ona fai suega i le tausaga na tea nei, o le a faauu nei ia Me o le tausaga nei e avea ma fomai ona totoe lea o le toa-16. O le toa-16 atoa lea, e faatupe uma mai e lea tamaitai Amerika, e tai \$40,000+ le pili i le tausaga. E le gata foi i lea, e totogi uma mai le rent a le Iunivesite o lo o faatino e le Matagaluega e \$2,000+ i le vaiaso. O lona uiga, e leai ma se tupe a le Malo o alu ai, o lo o faatupe mai lava e lea tamaitai alofa o Daffy Gords. O le tamaitai la ua 80 tausaga. Sa fialia ina ua ou tusi faafetai atu ina ua ou tulai mai, ma le tala sa ave i ai, o toe aso o totoe o lou soifua, ia e alofa mai ia Samoa. O le aoga lea, e talosaga mai Niu Sila ma Ausetalia tamaiti aoga i Samoa, aua o le aoga ua faavae i Samoa, a o le aofai lea o tatou alo ma fanau, lea e toa-3 alo tamaitai o Samoa lea o le a faauu ia Me o le tausaga nei. E faauu la e fai le faauuga i Brisbane i Ausetalia. Ia e le ma e tau talanoa atu, o le isi tamaitai o le alo o le Fofoga Fetalai, ia ma nisi tamaitai e toa-2, lea e ese lou fialia o lea faaopoopo nisi fomai. Mai lava i le taimi o faavae lenei Iunivesite tau amata mai, ua 7 fomai aloaia faauuina o lo o galulue i le tatou falemai e oo mai le aso, mai le Iunivesite lea. O le ala lea o lou faamalamalamaina o nai vala ia, e ui ina le i laga e se sui usufono, ae ou te iloa, na ona ou faapena atu. O lona uiga, o NPF, o Tax, o le ACC e totogi uma mai lava i Amerika e faaopoopo i totogi o latou ia e faigaluega. Ia, o tala na o le Iunivesite ina ia manino lenei Maota.

Sa i ai le talosaga a si Alii Pule, ma o le a taumafai ina ia tuuina atu i le Kapeneta. Na pau lava le mea o lo o tatalo mai ai i se sao o Samoa, o alauni e feoi ai nai tamaiti aoga. Pue le pasi, alu i le aoga, aua o le tele o taimi, o nisi i lau vaavaai i ai, o nisi o taumafaiga e alu lava ma le po i aoga a nei alo ma fanau, aemaise o le manaia foi o le latou faleaoga, o lo o fai lava i tua o le vaega lea sa fai muamua ma fale o le NKF, mautu mea uma. Ia atonu o le a i ai se taimi ona tuuina atu lea o lea pepa faatalosaga, a maua ni nai alauni, na pau lenei o le sao o Samoa e tataua ona tuu i ai, ua manaia tele, a o le run ina atoa o le aoga, o le seleni o lo o maua mai ai, o totonu lava o le Pulega a le Aoga i Amerika. Faafetai tele Toleafoa, faafetai le galue. Aua sa i ai nisi mai fafo sa tofia e pulea, sa i ai muamua Dr. Viali na amataina, a o lea ua tulai mai foi se tasi alo o Samoa, ia, le Afioga ia Toleafoa po o Manufalealili ma nisi o Samoa o lo o galulue ai. Faafetai tele.

Ona ou oo mai lea i le vaega o le NKF, e toatele nisi sa laga, o le a ou le tali taitasi, ae o le a ou tali lautele aua e toatele nisi o sui usufono sa laga.

Afioga Peseta Vaifou Tevagaena (Faasaleleaga 5): Lau afioga i le fofoga Fetalai pe maua se avanoa.

FOFOGA FETALAI: Ia malie lau afioga i le Minisita, fai sina malologa se i tuu atu i le sui o Faasaleleaga Nu 5.

Afioga Peseta Vaifou Tevagaena: Faamalo sausu foi ma tulei saunoa i lau afioga i le Minisita. Ou te avatu pea le talosaga i lau afioga pe alagatau... ona o le tulaga lea ua saunoa i ai le Minisita, ou te lauga ai pea ma ou lauga ai pea i le Matagaluega lea o Aoga, i le tulaga lea o le aoga o le OUM lea e saunoa i ai le Minisita, pe a talafeagai ma lau afioga, leaga e taua tele ona o lea foi sa saunoa i ai se tasi o sui o lenei vaega, tulaga foi lea i fomai ma nurses lea ua le talia mai e Amerika Samoa ona o standard. O standards foi nei i le tulaga tau le soifua maloloina. Ae o le ua e saunoa sao mai lava e le talia e Amerika ia standards ia tatou te faaaogaina i nei i Samoa. A o lea la ua e saunoa nei, ona o le taua ia o le vaega lea o le Iunivesite lea lau afioga i le Minisita, o lea e owning e le tamaitai lea mai Amerika. A o le taua la lea o le vaega lea, pe le mata o le auala lelei lea, e taumafai ai se avanoa e mafai ai ona aoina atu ai ma tatou tagata nei, ina ia mafai ona maua ni galuega agai i Amerika, Amerika Samoa, Hawaii, tulaga ia faa-standard ia tau fomai ma le soifua maloloina lau afioga.

FOFOGA FETALAI: Manaia foi si au taamilo mai i le isi pito. Ae ua lelei, o lea foi e faafogafoga mai le afioga i le Minisita, ua lelei lou vave ai ae le i oo le afioga i le Minisita i tulaga ia.

Afioga Hon VALASI LUAPITOFANUA TOOGAMAGA TAFITO SELESELE: Ua e silafia lau afioga i le Fofoga Fetalai, ou te ataata ona o le sui lea, e i ai lava taimi foi ia e pei e faaaloalo ae le migao. E i ai le gagana a le isi toeaina o le matou nuu, talofa e tainoino e.

O le fesili ma le talosaga e ui ina le lavea i se lauga, aua e leai lava se mea faapea na ou faalogo o lauga ai, ae o lea ou te faamatala atu, aua a iu le fomai i i, e mafai ona galue i Ausetalia, e mafai ona galue i Niu Sila, e mafai ona galue i Amerika, e le o se tala ole, o lea ua uma ona ou... Ae e le faigofie ona ulufale i le Iunivesite. E le faapea e... o tamaitai e toalua lea o le a faauu nei, e pei o le alo foi o le Fofoga Fetalai vaetu le Maota, sa amata mai i le tausii soifua ma sailiili lava ma oo ina toe aoga ma maua ai le ulufale i totonu o le Iunivesite lenei. O lona uiga e taua le tuualalo, ae o mea na, e au foi e i ai foi taimi e faatulafonoina ai le ulufale, aemaise foi o tulaga uma. Ae taua lau tuualalo o le a talatalanoa foi i le Pulega.

Ae pei ona ou fai atu lau afioga i le Fofoga Fetalai, ua amata ona matua mautu la ma mafutaga ma le tamaitai Amerika lea. Ae maumau e pe a na le 80 tausaga. Ae ui i lea na ala ona tau pipii i ai, ina ia mafai ona fesoasoani pea, ina ia maliu lava pe valaau le Atua a o lo o sasaa mai pea le tamaoaiga lea. A o la e faafogafoga mai le Pulega o la foi e faafogafoga mai le Ofisa Sili fou, ma le Matagaluega, e ese le taua. Ae ua ou faamauina lou finagalo o lea e faafogafoga mai le Matagaluega. O lea ua faamauina, se i tuu ane i lalo le finagalo o Faasaleleaga 5, ina ia mafai ona lotea i fono a le Matagaluega.

Aua e fono lava au ma lau Pulega i taimi uma, ae faafetai, o lea ua tali atu, malo faafetai mo ia tulaga.

O lau tali atu i mea sa laga, ona o lea ua i lalo o le Fatugao. E faafetai tele i le sui usufono mo Aleipata Itupa... ese le mataala foi o lea sui usufono, ia leaga o le tagata foi sa Ofisa Sili. Ua na ia iloa lelei o tulaga o fesoasoani. O le taua ia o le talosaga, e le gata foi i lau talosaga, ae sa laga e Gagaifomaga 2, le mea lava lea o le nofoa e avatu i tua i falemai i tua aua le faamamaina o toto. I le taimi nei i Tuasivi Savaii e 25 tatou gasegase, ae pe a i le 8 i le 9 a tatou nofoa. E le faapea o aso uma, e fetuunai lava mai i aso e faamama ai le toto sei tulou. O le mea ua matauina e le Matagaluega ma ua tuualalo mai le Pulega ma fomai, ua i ai options, vaai i le vave tele o le talosaga pe afai e...ua i ai options ua tuuina mai e lau Matagaluega, Valasi, e mafai ona tatou tilotilo i se mobile e kiliva ai i tua nofo ma faaaoga. E tatau foi ona tatou vaavaai leaga e tele faafitauli e ao ona silafia e sui ma le mamalu o lenei Maota, ia tulaga e pei ona tulai mai, pe a tatou taumafai e avatu i tua nofoa, ae ua faamauina ma ua amata ona faatalanoaina.

O nisi nei o mea pe a oo ina tuuina atu i tua a tatou fuafuaga lea, e tatau ona silasila lelei le Matagaluega i le saogalemu, aemaise o le aafia o tulaga e pei ona i ai ituaga gasegase faapenei. E le mafai ona faigofie ona togafiti, pe afai o le a i ai ni tulaga faapea. E muamua lava fai le study o le feasibility study o lona uiga e sailiili lelei ai tau ma vailiili lelei ai tau e aafia, aemaise foi tulaga o e galulue ai ma so o se mea lava. E tasi ia fautuaga ua tuuina mai e le susuga ia Mulipola ma le komiti faafoe, e tatau ona aotauina lelei tausii soifua mo le tomai faapitoa lea, ina ia faatino ai le auauanaga lea i tua. O le isi mea ua fautuaina, e tatau ona i ai ni tagata inisinia faapitoa, e mafai ona aoaoina aemaise foi o nisi o inisinia ua faatinoina nei galuega i le Matagaluega, ina ia mafai ona fesoasoani atili i tulaga e pei ona i ai. E tatau ona i ai se masini faamama toto, e aofia ai se masini faaleoleo. Aua o lo o i ai le talosaga a le Matagaluega, o lo o faatali nei le lipoti a le Minisita o tupe sa tuuina atu, e 30 nisi masini fou, e fia manaomia. O lona uiga la o lea ua uma ona i ai le fua lea, afai ae manuia mai, ou te iloa e tasi lea mea e tatau ona vaavaai lelei i ai, ae o le taua ia o le talosaga e pei ona faatulai mai e le faipule. Ua faafetai foi le taulagalaga aemaise i mea lelei. E pau lava le faaiuga po o le mea lea ua afea e le sui usufono ona o le mamao, ma taugata. A outou silasila i le tau lea e faamama ai le toto o tatou iinei, se i tulou, e na o le \$10. A tatou o i Niu Sila mo se faataitaiga e afe luaselau Niu Sila, e faamama ai lou toto, e le o ni tala e avane ai. Sa ou taumafai lea afai ae sau le tagata mai fafo, sa fausia mai i o tatou taimi aemaise foi o le Malo talu ai. Afai o se tagata e sau ma fafo, o se tau sa faatulagaina, e tatau ona 500 po o le 300 tupe Samoa. A o le taimi lenei, o tatou tagata foi ia, sa fai foi lau tala i le Matagaluega aemaise o nisi sa autovaa mai, e te i lava ua tu mai le mai, alu

i gauta fai mai e fia faamama le toto. A o aiaiga ma tulaga faavae, e te apalai mai o, pe afai o lea o le a e sau i inei, tusi talosaga mai, e fia manaomia uma e le Matagaluega talaaga o lou ma'i ma aafiaga, ona fai lea o le faamama. Aua foi o lea e alu lava le tatou faamama toto i aso uma. Ae a omai i inei, e tau atu i ai le tau e matautia, o nisi tagata e o atu i lou ofisa, o au la, o se Minisita e alofa tele. Ou te le iloa pe ua i ai sau tali ua say no i se mea. E alu atu e faigata, ona ou talosaga lea i uta se i silasila ane lava lau susuga i le alii pule, e a pe a toe tuu i ai sina... o le alofa, ua sau talatala mai o ia o le Samoa, ou fai atu ioe, o tatou uma lava o Samoa, ae na e fia nofo lava i Niu Sila, o lou fia nofo i Niu Sila. Ae malie o le a taumafai se faiga, e pei o nai vala na, aemaise la o faamalamalamaga na e pei ona tuuina atu.

O lea foi sa talosaga le sui usufono o Gagaifomauga 2, o le naunauga e leai leai lava se mea o faaletonu ai, o lea ua faamau i lalo, e i ai le talitonuga o le a galulue le Matagaluega i se taimi vave. E pei e tasi lena mea e pei sa faalagi mai pe sa tuuina mai...e iloa foi le tamaloa lea ua Ofisa Sili nei o le polofesa. Na ona talanoa mai lava o le sui usufono ma feiloai tau lea mea e tataua ona fai Valasi, e tataua ona fai se mobile e alu i tua i falemai. Ia i ai le aufaigaluega, ia i ai masini, leaga o le isi mea e faaeteete tele i ai, o le suavai. E tataua ona 10,000 lita, e spare pea i falemai, aua faamoemoega nei. E le gata i lea, a o afi faaleoleo eletise. O lea foi ua logoina mai au e le Ofisa Sili, o lea ua uma ona fai talosaga ia tofu falemai faaitumalo uma, ma afi fou, se i silasila Peseta. O le agaga o le Minisita ma le Matagaluega, ia vave ia lelei ma ia saogalemu.

A o saunoaga a sui usufono uma lea sa saunoa i le faamama toto, faafetai tele i la outou taulagalaga, aemaise lava o le taua o le mea lea. Lau afioga i le sui usufono sa laga aemaise foi le Susuga i le tiakono toeaina, aua e te lua popole, o la oulua talosaga o Samoa uma lava, e le faapea a lua talosaga mai ona faapito lea ia oulua uma. A e o le a taumafai se faiga, o lea ua ou fai atu ua faamauina e le Matagaluega ina ia taumafai e tofu....e te talosaga mai lau afioga, ae sa faatalatalanoa muamua e matou, e amata i ni nai nofoa taitasi pe tai lua i falemai itumalo i tua. A o lea ua talafeauga ma le talosaga mai, e le faapea la ua ou talanoa atu, o se mea o le a faatalise i ai, ae taatia mai lo outou finagalo. O lea ua ou faamatalaina atu faafitauli, o lea ua faamatala atu lavelave, ae o na lavelave o tatou o tagata soifua. Afai ae tatou le galueaina faafitauli nei, e foliga mai aua tatou te omai i le Maota lenei. a o faafitauli ia ua lagalaga e taua tele. Ae sa fesili lava, o le a le mea na le fesili ai i lea Faigamalo talu ai i le fia o tausaga o faimalo? A o lea ua outou talosaga mai ia Valasi e le i atoa se lua tausaga talu ona tu mai. E ui i lea, o uiga na o Valasi e talanoa ae galue.

O le isi talosaga sa tuuina mai o wheelchair.

FOFOGA FETALAI: Malie lau afioga i le Minisita se i toe tuu atu le avanoa i le sui usufono.

Afioga Fuaava Suluimalo Amataga: E faafetai tele i le afioga i le Fofoga Fetalai mo le avanoa. E leai se manatu e faalavelave le saunoaga a le Minisita aulelei. O lea foi ua ou toe faalogo atu o le Minisita alofa. E faafetai i le faamanino ma le faamalamalamaina o le tulaga e pei ona tatalo atu ai lenei itumalo. E ui lava o ni mafuaaga na aumai lava i le tulaga a e o lo o gasolo mai pea i Apia, ona o le faaaogaina o le tatou falemai o le faamama toto. Ae o le agaga taua o lea ua i ai se faamaite.

O lea ua e saunoa i tulaga o le feasibility study, e fai ai le tau atoa. E manaia foi le tulaga lea ua saunoa i ai i se tatou mobile unit foi lea, ae ou te iloa e tele foi le lavelave. E pei lava ona ou fai atu, ona sa ou involve i le task team lea na set up ina le 2005, lea sa matou agai i Singapore e study. O le suavai e taua, e le gata o le minimum pe o se mea e 10,000 lita, e tataua ona i ai, e ese foi le suavai mama ae tataua foi ona toe de-chlorinate le suavai. O lona uiga o lea ua faamama i le chlorination a le Samoa Water Authority, e alu atu foi toe fai le isi galuega lea. E pei o mea uma ia o lea ou te tau matau, o mea uma ia aemaise foi tulaga o le eletise, i alu alu masini ae pe atu le power ona mau lea ua le taavale le faamamaina o le toto. Ae taua foi mo si o matou itumalo. Sa ou asiasi o la e i ai le afi, standby generator, ae o le faamatalaga a nurses la e i ai e tele lava ina le faaaogaina. Ua ou vaai foi i ai, ua amata foi ona elea, aua o matou e tu i le matamatagi e tele ina pisisamia ma tulaga faapena. Atonu o se vaega uma lea e ono faaaoga i le tou study lea e fai, e fai ai foi ma run agai i tatou generators ia, aua ou te iloa a 10 pe oo atu i le 20 tausaga e toe faate'i atu ua mau le afi. Aemaise foi o tulaga tau le power, o la e i ai le wind turbine i o, e manaia foi le toe tuu atu ma ni nai solar, e taumafai lava e independent lava le siusiu foi o si o tatou motu nei i Upolu. Aemaise ai le tulaga o services uma ia, tulaga tau le suavai e uunaia ai i luga le tulaga o le faalelei, ina ia mama lelei le suavai aua le togafitiga o mai.

Aemaise foi o le lagolagoina o le polokalame lea a le tatou Malo i le miliona, e faaleleia atili itumalo, aemaise lava si o matou itumalo leaga o matou e taulai i ai le siusiu. E ova ma le itula o e alu, e pei ona ou fai atu e ova ma le selau tala e totogi e mai ia, e gasolo mai ai e fai a latou togafitiga. A faatolu la i le vaiaso, ua 300 e na o le penisini lava. Ia e omai fai a latou mea taumafa aua e fai mai e tataua lava ona taumafa e le i gasolo, aua fai mai a uma foi ona faamama le toto, e 3 i le 4 itula, toe omai foi fai se taumafataga. O cost uma ia o la e tilotilo i ai i latou, o lea e ala ona faaleo mai so latou lagona i tulaga faapena. Ae faafetai o lea ua silasila i ai lau afioga i le Minisita aemaise foi o le Pulega i vaega uma ia, ua taofia uma i totonu pe faamuamua le tatou Mobile unit pe faamuamua se lua aua e tataua

lava ona i ai se standby i alu alu faaletonu le isi masini a o la e i ai le isi masini e i ai. Ma le agaga faaaloalo faafetai.

FOFOGA FETALAI: Ia malo lava ou te iloa o lea ua manino. Ia saunoa lau afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: Faamalo faafetai i le sui usufono. E pei ona ou fai atu, o au lava ia, e ese lou fiafia. E tasi lea sui usufono e ese le...e taua lona sao, e foliga mai o ia sa malaga i Singapore mo ia fuafuaga o lo o i ai lona malamalama. E taua foi, a i ni mea o le a fesilisili atu e fesoasoani mai i le Matagaluega aemaise foi o tulaga aoao, sao lelei. E mafua ona le faaaogaina le afi o lo o alualu lelei lava le power, faafetai i le Minisita o Eletise, sa faaletonu soo lava le power ona o lea sa tu mai ai le alii le la i Falelatai.

Ae o le taimi lenei ua seāseā faaaogaina...ae o lo o taumafai pea e... ia la foi ua tu mai, ae o si mea laititi lava, ia ae tuu atu ia i si ou uso.....

FOFOGA FETALAI: Ona o lea ua taua lou suafa... ou te ofo foi au, ua e masani foi i le Maota. Saunoa mai.

Afioga Lupematasila Galumalemana Tologata Togia Tile Leia: Ia faafetai mo le avanoa, e leai agaga e faalavelave i le saunoaga matagofie a le Minisita, e pei ona tele tala i leni taeao, e le gata o le Minisita aulelei, ae o le Minisita e ese foi le faiga o ana ia saunoaga i le Maota. E mo le silafia e leai lau afioga i le Minisita, sa matua lelei lava le quality o le eletise i le taimi a o ou i ai, ae na amata loa le vaega lea le Minisita fou lea ua i ai nei, ua amata ona tau feololo te isi ma le faaaloalo.

FOFOGA FETALAI: Faafetai lava...

Afioga Hon VALASI LUAPITOFANUA TOOGAMAGA TAFITO SELESELE: O le a le faafinauina, e tasi lea o sui usufono e ese lou fiafia i ai. O le taimi o ou saofai i ina i le Itu Agai i le sefulu tausaga, e faapea uma lava la ta amio, a o lata amio foi...ia fua i le faaaloalo. E fai fai lava lo ta fia... e le avea lo ta faaaloalo e tuu ai manaoga o le tino. O manaoga la ia e pei ona tuuina mai, faafetai i le afioga i le sui usufono. O lea o le a ou oo atu i le falemai o si ou uso, leaga e i ai sui usufono sa laga falemai o lo o taoto nei, o le falemai i Falelatai ma le falemai i Saanapu. O lea sa laga foi e le sui usufono o Saanapu, pe le o tolotolo le mea lea o ...e tau atu i lau afioga Leana ua uma ona fai feutagaiga o lea foi e faafofoga mai le loia a le Matagaluega, ua uma ona fai tulaga uma.

Aua o le falemai lea e i Saanapu, e 35 tausaga o fai le falemai, e le o i ai se lisi, i le taimi o si ou tama o Polataivao Fosi, sa ou sailiilia, sa faavae ai le falemai lea. Ia o le susua o upu a le toeaina i na vaitau, lena na leai ai se lisi o le falemai. Ae ou te talitonu o lea ua uma ona faagaoioi tulaga e pei ona i ai. Ua talosaga mai foi i latou, ua uma ona aumai tulaga uma, o lea ua i le ofisa o eleele. Sa matou feiloai i le aso Gafua, o lea foi ua faagaoioi tulaga uma, e le faapea la o faatosotoso ai le tuai. O lea ua maea fuafuaga uma aemaise o tulaga, ua tuu atu i le Tenders board ma falemai uma lava o fale o fomai, o lea ua i aao o tatou konekarate le faagaoioiga o ia foi falemai po o fale o fomai, aemaise o tulaga ia i falemai o Saanapu ma ...E faafetai tele lava sui usufono o Falelatai, e tasi lenei o sui usufono mataala e tusi atu lava, e faamanatu atu ia tulaga e pei ona i ai le falemai, faafofoga mai le tatou itumalo, aemaise foi o le itumalo o lo o afio ai Le Ao o le Malo, e tatau lava ona i ai fuafuaga uma ia lelei, aemaise o tulaga e pei ona i ai i lenei vaitau.

O le tali atu lea, ia aumai lea o la outou faatuatuaga, e le i fauina Roma i se aso se tasi. A aumai lo outou faatuatuaga, e agai lava tatou i tulaga e pei ona i ai.

Ona ou me'i mai lea i le falemai o Vaimauga, falemai o Afega, falemai o si ou sui o Lefaga ma Faleaseela, aemaise o le falemai o Fagaloa. Ua ou tuu faatasia ia talosaga ona o falemai o Afega o se falemai ua leva ona i ai, aepeitai o le toe fesifiaiga, ma o lea ua mautu mai le tali a le sui usufono, faafofoga le itumalo. Ia o lea e talitali atu se mautu po o se eleele mautu o le a outou faamautuina, ma agai loa i le tatou fuafuaga ma tuu i totonu o le tatou polokalame. E le gata i lea a o le falemai i Vaimauga e pei ona faatalosagaina. O lea ua e faafofoga mai, o lena foi ua avatu ou elelele e le Malo, e tatau foi ona i ai se eleele o le Malo i lena vai mea, e tu ai lou falemai. E pei o le agaga a mautu mai tulaga ia, ou te talitonu o lea ua agai le polokalame, ...e i ai se taimi ou tali atu i le fesili foi a Falelatai i tulaga foi ia, o le a se tapenaga a le Matagaluega mo le Koviti pe a toe oo ina tulai mai.

A o falemai ia o, ...talanoa atu foi i le sui usufono o Lefaga ma Faleaseela, o Matautu foi i Lefaga sa i ai le falemai i na vaitau. Aepeitai ua sii i uta ae ua leai se mea ona o le sami, aemaise tulaga ua i ai. Ae ona e talitonu o lea sa ma fetuunai ma talanoa atu i le sui usufono, o le taua o le mea o le faapepa mai, mautu uma le tulaga o le mea e tuu i ia le falemai. Ne i mea foi ua o atu e asiasi ae taofia foi e nisi o aiga, e pei o le tulaga lena e faigata, ae manaia lava le faamautu mai maoti ia le tulaga e pei ona i ai tatou falemai ia.

O le falemai o Fagaloa, o lea e pei ona ou faamatalaina nisi vala, e tasi lea sui usufono....

FOFOGA FETALAI: Ia malie lau afioga i le Minisita, se i tuu atu le avanoa i le sui mamalu.

Susuga Maulolo Tavita Aмоса (Sagaga 2): Ne i mea ua see ese lau afioga, ae faaleo atu lau afioga i le Fofoga Fetalai, se agaga faafetai o le itumalo lenei o Sagaga 2, ona o lea e faafofoga mai le itumalo, o se tulaga ese lea i fuafuaga a le Minisita. Ua le gata o le fuafuaga mo falemai la ua i ai nei, ae o lea ua manino le faafofoga a le itumalo, fuafuaga mo falemai o lo o i ai se faamoemoe ae o lo o toalia. Ulugia ma lo outou aiga, o lea ua outou faafofoga mai, sa o tatou feiloai i le na vaiaso na tuanai nei. Ua see foi le vaa o la outou sui usufono, mo le manuia o le itumalo. O le popolega, ne i ave ave...o le malaga faiaga, a le timuia e fasia. Faaoolomaau atu i lena itu o le aiga, o lea ua faataoto mai le fuafuaga alualu mamao a le afioga i le Minisita ma le Matagaluega o le Soifua Maloloina. O le popolega ne i toe apata atu, a ua leai se tatou. O le avanoa lenei faaoolomaau atu ai lava i le tatou galuega faufaatasi. Ua tatalo mai le Malo, o le soifua e le o se mea e oo i ai se malosi o le tagata. E tatou te tau fai taumafai Ulugia ma lena itu o le itumalo. Ae a faapea lava o lea lava e faauliulito lo outou finagalo, o lea ua faafofoga mai, lau tali na aumai ia ma ua ma Ututaaloga, o le a foi, faamaea tulaga uma. Ua ta le matamuli lava e aumai i lumamea lenei mea, popolega fefulisaiga a le Koviti, tatou te le mailoa pe ua lata mai i faitotoa o Samoa. Ona alofagia lea o le soifua maloloina o le tatou itumalo. E faafetai i lau afioga i le Minisita faafetai tele lava.

FOFOGA FETALAI: Tulai mai le sui mamalu o Vaimauga.

Afioga Sulamanaia Fetaiai Tauiiili Tuivasa (Vaimauga 1): Ae le i faia foi se tala, e muamua ona faatalofa atu i le Maota e tusa ai foi ma le fonousu a le atunuu i lenei taeao. Ae matau lava ma le totoa le saunoaga a le Minisita, e momoli le agaga faafetai. E mai lava i le taimi na malele ai ma saunoa le Minisita i lenei taeao, e lagona lava le meemee ma le faafetai. O ituaiga Minisita nei e faatupulia ai le fia galulue o le Matagaluega ma le atunuu, tauia le tautua, faafetai.

E iloa lava le tupu i ana aga, o lea foi ua faafofoga si ou itumalo, e momoli le agaga faafetai, e pei ona pau foi le fofoga o Tuisamau ia Maulolo i lenei taeao, o le agaga faafetai lena o lenei itumalo.

O lea foi ua faafofoga mai le Minisita o le MNRE, faafetai o lea ua faamatuu mai nisi o vaega o le elelele lea mo le fale o le itumalo, ae toe faamatuu mai se isi mea o lea ua faamatuu mai le falemai, e momoli le agaga faafetai. O lea foi na e saunoa i le taeao lenei i le sui o Falelatai, pei o le agaga lena, e leai e le o afio i tua Le Ao o le Malo, o lo o afio i elelele o le Vaimauga. Ae o lea ua fetau ma le falemai, ia e latalata ifo i ai le susuga

foi po o Le Ao mamalu o le Malo. o le isi foi saunaoga a lau afioga i le Fofoga Fetalai e fia faamalamalama, leaga o lea e pei e tuuaina lenei faigamalo lenei fai mai e le i i ai i talosaga i le Paeaiga ua tuanai. Na ala ona leai ni talosaga i le faamama toto lau afioga, ona e le i toatele nisi sa i ai i lenei vaitau. Ae o le taimi nei, ua faatupulia pea le toatele o gasegase o le atunuu, pei o le ala lenei, faafetai i lau faasoalimalelei.

E momoli le agaga faafetai, o lea ua afea si ou itumalo, po o le a le taimi e te afea ai, o Vaimauga e faamatuu atu ai le falemai tele i Motoootua, e agai mai tua ma toalia i i, i le Vaimauga.

FOFOGA FETALAI: Se i tulai muamua mai le sui o Safata ona tuu atu lea ia Lefaga ma Faleaseela.

Afioga Leana Ronnie Posini: Lau afioga i le Fofoga Fetalai, faafetai tele lava i lau afioga i le Minisita, e masalo foi o au le isi sui usufono e masani ona leotele i totonu o le Maota lenei i le falemai o lo matou itumalo. Ae o lea e momoli le faafetai tele, o lea ua atoa le tapenaga o le faiga o le falemai i Saanapu. O lea e momoli atu ai le faafetai tele i lau afioga i le Minisita. O le a talitali foi le itumalo e taimi e faatino ai ou te talitonu e tele a ta sootaga i ta Nuu ma le agaga faaaloalo.

FOFOGA FETALAI: O le agaga faafetai foi Lefaga ma Faleaseela.

Afioga Masinalupe Makesi Masinalupe (Lefaga ma Faleaseela): Mo le faasaoina o le taimi o le Minisita e faaleoina foi lenei itula ina nei nofonofu lou sui ona faapea lea o le Minisita, ua leai se faamatalaga o le sui a Lefaga ma Faleaseela. Ae momoli tele atu le faafetai, faafetai le tofa i lau afioga i le Minisita. O lea ua maua atu o lea ua aafia mai si o matou itumalo aua le feagai ai ma le faatinoina o lea vaega taua o le falemai. Mo le silafia ua leva ona tulai mai nisi o le vaega lea a le HRPP le toe faatinoina a se falemai fai si leva o aso talu ona , aua pau a ia o mea na mafua ai ona tofi mai a'u e le matou itumalo o le falemai , o le aveese o tax a faifeau ia ma auala, pau lava ia. Ae faafetai o lea ua amata mea ile falemai , ia saga faamanuia pea le Atua ma vaai pea foliga talavou lau afioga i le Minisita faafetai.

FOFOGA FETALAI: Lau afioga ile minista nao le fia faafetai a lea ,ea lea fia fai atu lau afioga, malo foi lauga mo le faamalamalamaina o finagalo.

Afioga Hon VALASI LUAPITOFANUA TOOGAMAGA TAFITO SELESELE: Malo faafetai lau afioga le fofoga fetalai ese lo ta fiafia ile tele o faafetai, aua o le faafetai o loo faafofoga le Atua e le soona momolia

le taulaga faafetai, faafetai i ou manaoga aemaise o tulaga pau a lau tala o le maota lenei tatou te talanoa ai e avatu foi le talosaga ia outou uma ia sa talosaga mai i falemai, faanatinati atu , faapepa atu ia tulaga e pei ona iai ma saini atu ai le sui usufono, Alii ma Faipule i tulaga ae aua le saini atu nao ni vaega aua e iai foi le eseesea. A o le taua lena o loo taumafai ina ia fausia ia fuafuaaga uma e fesoasoani e tali ai le fesili lea a le Minisita le sui usufono mai Falelatai sei iai se tasi ou oo atu. O lea la ou oo atu i Fagaloa ona ou oo lea ia Lufilufi e pei a ona ou faiatu manino a le faamaumauina o finagalo aemaise ia aua nei alu se sui usufono i le fale ae lei tali ina lana faafesili. O Fagaloa ia lea ua ou faamatala atu se vaega afai o faafofoga mai le itumalo, sa tulai mai le Maasina e Minisita, tulai mai le Ofisa Sili o le Pulega o le Maasina sa fausia ai le fale lea ou te faiatu ai ua vaoa ma ua pei se fale manu aua ou te aluatu o loo iai povi. E leai ma se mai vaaia e lei iai foi se teine fomai o lona uiga o le tala manino afai e 300+ afe na alu i lea falemai a o lea ua e toe tatalo mai ia le sui usufono o Fagaloa tasi lea vaega o loo tuu atu i vaega foi ia suesuea mea faapea, sei saili lava aua saili mai e le tenders board e leai se tupe na tender ina e leai se tender na faaaogaina o lau tala e le avane ai ma e taumafai e faaleaga se sui a o le tali atu ia Fagaloa. Tasi lea sui usufono o isi taimi e aluatu ma pizza ia te a'u e le natia, ona ou faiatu lea aile sui sole! Se ou te le ai ina na mea o pizza aua ou te le masani ai ae faimai se ae alofa Valasi o le sui e ese le finau ma e talu a ona tulai mai ma lauga mai o le falemai i Fagaloa. Ae ou te lei taua la iai ile taimi na lauga muamua ai le faafitauli tele lea tupu ii e lei iai se faaaogaina o le na falemai a ua fai ma fale manu poo fale povi a le itumalo e se lo'u faanoanoa i le faaaoga sese o tupe o le tatou atunuu, o le tupe a oe ma a'u ma tupe a le atunuu a o lea. Ae aumai lou faatuatuaga, pau le mea tusi mai poo fea e te manao, aua o lea foi sa iai nisi o faasea a le itumalo ua ave a ave i o i le isi pito o Fagaloa, ae a pe a tuu i le totonu o le ogatotonu o le mea e finagalo. O lena foi ua mautu le tou council ia sei silasila ane iai aua o polokalame a ia e faagaioi ae e leai se tulaga a mea ua faaaoga sese lena fale poo ua le faaaogaina ona iai lea. Pei ona ou fai atu na omai nisi o toeaiaina talanoa mai pe mafai ona latou faaaogaina faa-falekomiti ou talatala atu loa nai vala ia e lei toe omai a i le ofisa. Ae ou te talanoa manino ma talanoa mama i lau susuga le sui usufono mamalu a lailoa e laga le falemai ae faafofoga mai o lea ua tali atu, taua ia o lou aumaia o sau tusi ma saini ma mautu au fuafuaaga uma aemaise ai foi le fanua ona silasila ai lea. Aua o Fagaloa le isi itumalo ua ese le tu ese ma e mamao i lalo e tatau lava ona iai tulaga uma , lea faafetai atu ai lau afioga ona o lou lagalaga aemaise tulaga e pei ona aumai ai lau mataupu. Lau afioga i le sui mamalu o Anoamaa ia lea sa ta fetuunai sa talatalanoa, lea la ua faaalua manino o lea iai le tulaga o lea aumai le tou fuafuaaga mo le sii i Uta. Aua e pei a o le mea lena lea sa talanoaina muamua aemaise foi ia nisi o mea o loo fia faaleleia ae o le vaai a le Matagaluega a toe alu atu se isi

faaopoopoga ae pu moomoo lava le mea o loo iai le falemai. Ae a maua se eleele i uta pei ona e talanoa mai ua iai. Ia faafetai pei o le tali atu lea lau afioga ma le talosaga ae o le a faatalitali atu le tatou Matagaluega. O le sui lea o Safata lea na saunoa mai e iai ma sootaga, e le faaaigaina na faia ni galuega, ae malie pau le mea e te faafofoga e fesili lava Mulimai ia Muamai afai na ou muamua mai i le maota fusu mai iina i aso e tatau la ona e faalogo lelei mai i le faiaoga lea e fai atu. Ui i lea faafetai aua te popole o lea ua faataoto fuafuaaga uma ua iai le tulaga e pei ona iai ma o lea faafofoga mai la'u loia ua uma ona aiaia ia tulaga uma ma tuu atu ile MNRE ina ia faagaioi loa fuafuaga mo le tatou fanua e faatu ai le falemai. Na ou oo mai lea i le sui o Salega le afioga i le aloalii ia Fepuleai, o lana afi lava lea sa tulituli mai e pei ona ou fai atu o le vaiaso a o lei fonole Palemene. I le vaiaso atu i tua sa ou iai i lou falemai. E faapena la'u amio, a loma le fonole a le Palemene e tatau ona asiasi poo ua faataunuu. O le mea taua ua iai le afi ae sa faatali mea o parts. Na ou fesili lea i la'u Matagaluega aisea le mea ua tu ai le afi, o a'u foi e le o se tagata e mateletele i le afaigaluega. Matou te talanoa faa-uso e taumafai ina ia vaai lelei, lea foi la ua tali mai le Ofisa Sili o Pulega, le Afioga i le Laaunafausia, o lea ua iai talosaga ia, o le tuuina atu o afi fou i tatou... a o le taimi nei e faaalu pea le afi la iai le taimi nei, mo le faagaioiga o le tatou falemai. O le isi vaega sa laga e sui mamalu pei o sui o Gagaemauga 2, o le mataupu lea i le tulaga lea le uiga ma le tu ma le aga o fomai i Safotu, faapea ua vili atu tamaiaatai tausii soifua i luma o le falemai ae le atoa se fia iata le mea la iai fomai. O la'u fautuaga le sui usufono, o tatou uma o taitai o le atunuu. Afai o iai ni faaletonu e te tau atu iai, o oe o le taitai o le atunuu pe faipule e le tau tulia sei alu atu le Minisita o soifua maloloina alu e fai, galue otegia le fomai ma fai ai le tala i le mea lea peitai o lea ua uma ona faatonu ma talosaga i le Pulega, aua e iai le medical council a fomai. E iai la tagata la faapea a faaletonu ua tuuina ile council lea ma fai ai le fua ae faafetai tele i le sui usufono mo lea mataupu laga ona e taua ao la'u fautuaga ile maota tatou uma o taitai o le atunuu aua nei poi pe e te alu atu pe te susu atu lava oe a iai ni faaletonu ia ona aumai lea i tulaga e pei ona iai.

FOFOGA FETALAI: ia sei tulai mai lau afioga le sui mamalu Gagaemauga Nu 02.

Tofa Seuamuli Fasi Toma (Gagaemauga 2): Ia faafetai lau afioga i le Fofoga Fetelai mo le avanoa, taua tele foi lenei taimi sei fai foi sina malologa a le uso, leaga e toalua lava tama na o i le taua o Fiti. O lea ua oo tonu a le saunoaga a le afioga i le Minisita i itu sa ou atugalua ai, leaga e le faapea faatoa tupu. O le masina 2021 sa tupu ai le mea lea sa ou talatalanoa lea i le Pulega aemaise foi latou o loo faapea ona faafofoga mai, 2021 ia

Aokuso, 20222 lea foi ua toe tupu i le 2023. O lona uiga e leai se fofo o le faafitauli, le ala tonu lava lea o lou faafofoga mai o lea ua ou avatua i luma o le Palemene lenei aemaise le faafofogaaga a Samoa tulaga lae tupu i o. E le faapea ou te faalogologo tala, tulaga na ou vaai i ai o lo'u ma'i foi lea sa tupu ai, o le ala lea o lou avatua i lau Afioga i le Fofoga Fetalai ma le paia i le Palemene, i tulaga o lae tupu i le fomai la e i o i le matou itumalo ia tulaga e pei ona aliae mai. E avatu le mai omai lea o nai teine tausimai vaai ma fesootai le fomai lae taotooto mai tua. Pei o le agaga lea lau afioga i le Fofoga Fetalai matau atu i le saunoga a le Minisita pei ua galo lau afioga i le Minisita le falemai lea e i i Vaipouli. O le falemai lea i Vaipouli, measili ona taua faafetai lea ua tulai mai le Ofisa Sili o le Pulega fou masalo a afio atu Ofisa Sili o le Pulega fou, o le Polofesa. Se i silasila lava i le falemai lea, o le tele o talosaga o loo talosaga mai i falemai a o le falemai lea e i Vaipouli toe a o tagata e faatinoina le galuega i totonu o le falemai aulelei le fale e pei o le paepae o le afioga i le Minisita. O le mea foi lea i le faafofoga mai a lou ,o le matua falemai a lelei le suavai, lelei auala, lelei moli mea uma lava, a o le vaivai o le faafitauli, faafitauli o loo atugalua ai vae atu lau afioga i le Fofoga Fetalai ma le paia o le Palemene ma le faafofoga a Samoa fai mai e aitua le mea sei silasila iai ae pei na o na pau lea.

FOFOGA FETALAI: Se i tulai mai lau afioga Salega.

Afioga Fepuleai Faasvalu Faimata Sua (Salega 1): Faafetai mo le avanoa, o le feagaiga lea a Utu ma Taua o Salega. Ae ua ou tulai lenei vaega o le taeao faafetai i lau afioga i le Minisita, ona o le afi lea ua oo atu i lou itumalo ma le matou falemai. E lalelei ma matagofie le minisita i lona aulelei ae le galo le saunoaga a le Minisita i lana tali muamua ia te au, le afi na saili mai fafo. Na ou alu atu loa siaki ae vaai atu i le afi, o le afi la e tu i pau, o i ina na ou iloa ai le afi e le o se afi tumau e pei o se afi e faavaitaimi. O le ala o lo o toe tatalo leaga o le afi tumau e tataua ona mount lelei ona tulaga i sima a ola aua nei tete aua nei pao pe lagona atu e mai ao le afi lea iai o le la tu i pau o lona uiga e iai le taimi e toe o atu le matagaluega e toe toso mai ia toe ae pei o le ala lea o le talanoa atu afai o faatali ni parts faamolemole avatu se afi fou pei ona taua o lau faamoemoe atu i lau afioga faafetai.

FOFOGA FETALAI: ia tulai mai lau afioga ile minisita, ia sei tulai mai lau afioga ile sui mamalu o Anoamaa.

Afioga Alaiasa Moefaauouo Malagaitutogiai Sepulona Moanau (Anoamaa i Sasae): Faafetai mo le avanoa i lenei taeao ua maualuga foi le soifua i le tatou maota i lau afioga i le Fofoga Fetalai ma le paia. Tatou fonu e iai le pese sa fai a le matou Nuua ma le matou Sisigafua, sa iai le upu

faapea saili sou taeao Falefa. O lenei la taeao o lea ou te fia pese ai i le Minisita, saili sou taeao Anoamaa pei o lana saunoaga matagofie, o lea na fai se falemai fou i lenei itumalo. E moni a au e pu moomoo le eleele o loo iai le falemai a ua ou vaai i se eleele tele, ae o lea vave faaoo atu lau afioga le faamoemoe lea i se taimi. Vaavaai foi isi auuanaga e pei ona e saunoa i isi sui i mea faamamama, fale maliu ma isi mea faapena o lea taumafai e sui se eleele faatino ai le faamoemoe lea ae faafetai i lou afea o lenei itumalo.

FOFOGA FETALAI: Ia se i tulai mai lau le sui usufono o Vaa o Fonoti.

Tofa Mauu Siaosi Puepuemai (Vaa o Fonoti): Ese foi le faalogologo ma le matau foi i lenei taeao fou ia ua malie foi le sausau a le afioga i le alii Minisita o le Soifua Maloloina, ma ua faamalie foi se vaivai o lenei itumalo pei ona saunoa nisi o afioga, o Minisita o sui mamalu o le palemene o Fagaloa pei e ese a e taamilomilo nei ile circle foi lea o Samoa soo lelei ao si ou itumalo pei e te oo atu loa ile mafa na e pei e te faatafatafa ese lea , ia tatou itumalo ia lea ua saunoa manino le afioga ile alii minisita o le a fausia se tatou falemai poo ai foi le aiga le tatou afioga i Taelefaga pei foi ona ou tuu mumusu atu se avanoa o se ogaeleele e fausi ai aua o ii tonu o lea e centre uma iai o tatou itumalo lea ua faafofoga o lea ua to le matuupalapala mo le tatou itumalo le Vaa o Fonoti lea o le a fausia se tatou falemai fou ia ole ala lea e tulai atu ai e faaleo ia le agaga faafetai tele aua o le upu moni a lea masalo a o le taimi a ou te oo ai le ofisa ile afioga ile alii minisita e tutusa lelei a ma le minisita ia Olo e lua a le tolu pizza e eseese uma flavors mafua i se a ? o lou gaugau ona o lou vaai alofa i si ou itumalo ae faaleo atu le agaga faafetai lau afioga Minisita Soifua Maloloina ona o lea foi vaega.

FOFOGA FETALAI : tulai mai lau afioga ile Minisita o le Soifua Maloloina

Afioga Hon VALASI LUAPITOFANUA TOOGAMAGA TAFITO SELESELE: O le pizza lea na avatu e Mauu o le poo le sui usufono o Fagaloa ou te lei aia ou te faaitete poo se mea o tuu ai se mea foi lea poison nei se mea e ataata atu ao le faaumaga o le Minisita lea ua alu atu ai, ui i lea faafetai lau afioga ile sui , faafetai foi ia i latou o sui mamalu sa sausaunoa.

FOFOGA FETALAI: Malie lau afioga ile Minisita o le Soifua Maloloina sei tuu atu leaga lea foi ua taua le Minisita o galuega Tetele .

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese): E sao na avatu pizza ae leai ma se pizza o faaaogaina e mafua ona ou tulai atu ile mea lea ona o loo faafofoga ia le mamalu foi o le maota i nei faapea uaia fai ai le galuega a lona itumalo e le faapena foi se faiga o le tatou galuea nei tei ua ou faiatu e sao ia ona gasolosolo atu lea o MacDonalds o meauma a ia taeao le tatou maota male faaaloalo.

FOFOGA FETALAI: Ia malie lau afioga ile Minisita o le Soifua Maloloina , ua fia faafogafoga a le maota i lau folasaga talitonu o le tele a o le maota o fia faafogafoga lava i lou siufogoga aemaise lava ole faataunuaina o ou tiute a ua iai le manatu o le a faauau lau pea tatou taliu mai tatou malologa.

Na faataatiaese Taulumaga a le Fono Aoaofaitulafono mo lana malologa masani i le itula e 10:45 i le taeao ma toe faaauau i le itula e 11:26 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.
Ou te tapa lau Afioga i le Sui Palemia mo le lafo.

LAFO MO LE SUIA O ITULA FONO

Afioga Hon TUALA TEVAGA IOSEFO PONIFASIO (Sui Palemia): Faafetai i lau Afioga i le Fofoga Fetalai. Faafetai mo le avanoa. E momoli atu foi le faamalo i le tatou Maota mo le onosaia o le faaauauina o tatou Taulumaga o le Fono. E i ai foi le manatu ua maea uia le ala i sao ma ua tupu foi matagi i liu o vaa, ua maua se faasiligamalosia i le paia o le Palemene. Faafetai i le Atua i Lana foai.

Lau Afioga i le Fofoga Fetalai e pei ona matau atu ua le o toe toatele matou o lo o totoe mo le tali fuaitau a le Malo i mataupu sa laga e sui usufono mamalu. O le ala lea o le tulai atu e faatu le lafo, *Ina ia faataatiaese Tulafono Tumau 32 mo le suia o tatou Itula Fono mo le aso Fono lenei e faapea; o le a faaauau pea a tatou Taulumaga seia aulia le itula e 1:00 i le aoauli ona faataatiaese lea mo se malologa ma toe faaauau ai i le itula e 2:00 i le aoauli seia tolopo i le itula e 6:00 i le afiafi a nanei.*

O le lafo lea ma le faaaloalo lava lau Afioga.

Faaluaina e le Minisita mo Faiga Faiva.

Na faamaonia le lafo.

Na toe faaauau felafolafoaiga i luga o le Tulafono Tau Faaofi o le Faatatauina o Tupe Faaopoopo (Nu.1) 2022/2023.

FOFOGA FETALAI: Ia, o le a faagasolo le tatou galuega e tusa o le lafo ua faamaonia.

E faataatiaese tatou Taulumaga mo le malologa o le taeao o lo o saunoa le Afioga i le Minisita o le Soifua Maloloina e talifuaitau i mataupu sa laga e sui usufono mamalu. O le mea lea ou te tapa lau Afioga i le Minisita mo le Soifua Maloloina e tulai mai mo le faaauauina o lau saunoaga.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai ma le mamalu o le Maota, o le a tuusao se lagona ina ia tulituli a tatou mataupu. E le o toe tele foi ni mataupu sa laga e sui usufono.

Ona oo mai lea i le lagaina o le faafitauli i le falemai i Tuasivi, e i ai nisi o sui usufono sa sausaunoa ma taua le tulaga i wheelchairs po o nofoa foi nei faataavalevale mo tagata mamai, aemaise o tulaga pei ona laga e le toaina matua ia Tea Peato i nisi o faaletonu o lo o vaaia ma le tulaga e pei ona i ai le falemai. Ia ma le auaunaga lava a le aufaigaluega i tulaga e pei ona i ai.

Lau Afioga i le Fofoga Fetalai ma le mamalu o le Maota, faafetai i sui usufono sa laga ia foi tulaga. E pei lava ona ou fai atu, o le taua ia o manatu e faufau ai tulaga e pei ona i ai le lelei agai i luma o le tatou Matagaluega, aemaise foi le motu tele i Salafai.

Sa taunuu mai i le vaiaso na tea nei container o mea o wheelchairs, aemaise foi o lo o i ai se kamupani sa fesootei atu ia te au, e taunuu mai i le vaiaso nei i le aso Tofi ni containers foi o wheelchairs, pe a ma le 200 i le 300 wheelchairs ma le tulaga e pei ona i ai nisi meatotino. O le kamupani e taua o le Pacific Cast. E faafoe e nisi o alo o Samoa i Ausetalia, o lea ua fesoasoani mai, sa latou faatauina uma le tele o nei oloa ma tuuina mai. E i ai se taimi o lea ua faafofoga mai le Matagaluega i faafitauli o le... a o lea foi ua i ai le manatu, o le a taumafai ina ia faasoaso lelei wheelchairs nei, a maua lava le 10 wheelchairs a le falemai i nuu i tua e faasoaso lelei i gasegase pe a manaomia. Aua o le mea o lo o iai o le tele lava o falemai e leai ni wheelchair, pe tasi pe lua. O lea ua faafofoga mai le Matagaluega i le tali faaaliali a le tatou Minisita po o le tatou Matagaluega, ia onosai, o

uta uma nei e aumai o wheelchairs, e tatau ona faasoasoa lelei i tatou falemai i nuu i tua, ina ia faafoia faafitauli o lo o tulai mai.

Ia, sui usufono sa laga ia faafitauli, o le a taumafai lava ina ia mafai ona oo atu le faasoa. E le gata i lea, e laga pea tulaga e pei ona i ai le silasila a nisi o tatou sui usufono, ia o le uiga lava lea o le mea. Ma e tasi lenei Matagaluega, o se Matagaluega e ese le inosia o lana auaunaga, tulou, le upu ma le gagana, ona o tatou e agai uma lava i le falemai. E leai lava se isi e nofo loa i le falemai e vaavaai solo fofoga, ia e oo lava... toeitiiti lava oo i le totolo a le pili po o le moo i luga o le... o lo o faitio i ai nisi o sui usufono. Ae malilie le tatou Maota, o tatou o taitai o le atunuu, afai e te silafia lava se mea faaletonu aemaise lava sui usufono o tatou itumalo, ia aua ne i e faatali se i e lauga i le Maota lenei, ae ta fesootai, aemaise foi o tulaga e pei ona i ai. E tatau foi ona tatou lagolago i le auaunaga, aemaise galuega a le au galulue po o alii foi ma tamaitai fomai, po o latou o lo o tauaveina tiute ma faiva.

Lau tofa po o lau Afioga i le sui usufono matua, o le a taumafai lava ina ia faia pei ona e... leaga o lea e te alaala i Salafai aemaise foi o lou itumalo, ma ia maua pea le onosai aemaise... ia ma e taumafai e te sau i ta fonofono pe a valaau atu, ae aua e te nofonofono mai Savaii ma matau faaletonu o le falemai, ae tatau ona e sau e vaai lau Minisita ma e talanoa mai, ia aemaise tulaga e pei ona i ai.

Ae faafetai tele i lou sao taua, aua e te fai mai lava oe o au na ou tauanaua oe e te alu i le palota, a o lea la ua e silasila i ai, e ese le taua o le taulagalaga ma le faasooso o oe e te alu, o lea lava o le a uma lou soifua i le Maota. E ui o lea, faafetai mo mea sa laga.

O le sa laga le tausinga e le o lava. E tali atu faapea, i le lalolagi atoa lava, o le tele o atunuu, e tasi ia faafitauli numera tasi, a o le faiga o lo o fai ai nei le Matagaluega o lo o lagolagosua le Iunivesite aemaise foi le tulaga o le tatou Matagaluega ina ia faailogaina pe lagolagoina tulaga o sikolasipi. O lo o i ai le fuainumera pe a ma le 80 tausinga ina ia faauuina i le tausinga. O le 80 o se fuainumera lelei tele. Ma i le tausinga na tea nei e lata i le faaiuga, sa ou i ai foi i le faauuga o nisi o tausinga pe a ma le 76 tausinga sa faauuina ai foi. E ese le taua o tulaga e pei ona tulai mai. Ae moni a au, o le sui usufono sa laga ia tulaga o... aveane ai ma Niu Sila i le taimi sa vevesi ai i le Koviti-19, ua sioti tausinga, ua faaoga nai fomai i tulaga e pei ona i ai le galuega ona ua le lava tulaga e pei ona i ai ia... ae le i fausia Roma i se aso se tasi, tatou te vaavaai pea i le tulaga o le agai i luma, ma e aoga foi le tuualalo ina ia fagufagu ai pea le faagaoioiga o ia fuafuaga uma.

Ona ou oo mai lea i le Koviti-19 aua tasi lea mataupu sa fesiligia.

Tofa Hon Faimalotoa Kika Iemaima Stowers-Ah Kau (Gagaifomauga 1): Lau Afioga i le Fofoga Fetalai...

FOFOGA FETALAI: Ia, malie lau Afioga i le Minisita se i tuu atu le avanoa i le sui usufono mamalu mo Gagaifomauga 1.

Tofa Hon Faimalotoa Kika Iemaima Stowers-Ah Kau: Faafetai i lau Afioga mo le avanoa. E momoli foi le faafetai tele a lenei sui usufono ma lenei itumalo i le saunoaga matagofie a le Afioga i le Minisita o le Soifua Maloloina.

Ae ua ou tulai atu ona o lea ua ou matau atu o lea ua see ese ma mea nei o falemai, o lea ua oo i mokesi ma aufaigaluega ma na, ae pei sa avatu... sata lauga ai foi i le Tala Faatatau Autu o le Tupe i lata lauga o le la tausaga le falemai lava lenei pei foi ona taua e nisi o sui usufono i si o matou itumalo o Gagaifomauga 1, lea e aafia ai ma Gagaifomauga 2 ma Gagaifomauga 3. Sa ta faamatala faafia, pau lenei o le itumalo e le i faatali i le Malo, vaai atu ua leagafaia le falemai, na o e suetupe i fafo, omai galueaiina le falemai ua agai i le 10+ lea e molimau le Susuga ia Laauli sa fau lava e... O le faafetai, ia o lea ua pei foi ona taua e nisi le lalelei o le Minisita, ia, tau e nisi, o lea ua ou faaopoopo atu ai o le Minisita alofa, ae o lau au faalagiga lea ua i ai, o le Minisita talimano. I lau faalogologo i lenei taeao i sui usufono uma na lauga, ona ou faapea lea, e ui lava ina leai se tupe o i ai i totonu o le Tala Faatatau Faaopoopo, a o lea ua faamalieina uma sui usufono o le a fai le a, o le a avatu afi, o le a avatu fea, ae o le a avatu fea. Ia taatia ia lena, ae faafetai, ou te talitonu i le faafofoga mai a le atunuu, faafofoga foi sui usufono o itumalo, ua fiafia o le a faatino, ia ma le tatalo.

O lau la tulai atu ona e le o se mea e tuu i totonu o le Paketi, o se tupe ua leva ona aumai, o lo o faafogafoga mai susuga i alii fomai, o la foi e faafogafoga mai Tagaloa sa faapena ona alu asiasiga i na taimi i le matou falemai la lea. O le tupe na aumai e fausia ai fale e nonofo ai fomai. O lea na tufa i tua fomai, o le ala lena. Ae le gata i lea, o le faatofutofusia o le faaleleia o mea uma i totonu o lea falemai ma lea falemai. A na o ita o se tagata faimea faapito, ua ta tago tope le falemai o lota itumalo i le taimi na ota i ai. Ae paga lea, e le faapena ona fai le tatou galuega. Ia ona sa i ai foi faafitauli na tutupu mai, ia sa manao ai lava e faaalu pea le process lea, accountability ma le transparency ma mea uma, ina ia ogatusa e tusa ai foi o faiga faavae.

O lea la ta te augani atu i lau Afioga i le Minisita, poo afea ea e ono oo atu ai, aua ou te talitonu o lea ua faapena ona faasopolia, o la e foi e faafogafoga e pei ona ou taua le aufaigaluega. Faamolemole ua manaomia tele e le falemai o le itumalo lea i totonu o Safotu. E pei lava ona ou taua muamua foi, o le matua tele o le population e sosoo ma Tuasivi la e serve i i le falemai lea. Ona ou tatalo atu ai lea, ou te talitonu o se taimi lata mai lava ua manaomia tele. Ia pei foi ona taua, faafetai i le sui usufono foi pei ona laga foi le... ia le mea foi lea a le aufaigaluega. Tatou te le iloa foi

faafitauli o feagai ma le afaigaluega i lea taimi ma lea taimi. O lota foi taimi, sa i ai foi tulaga faapea sa ta tau atu ai. Na pau o le mea, a ta fesili atu la asiasi atu ae fesili atu, a o fea le fomai? O la e oso atu... Valaau le fomai e afio mai se i... ia ona afio mai lea o le fomai, po o fea le mea o tietie i ai le fomai, aua na i ai mea tutupu faapena, ai o alu e asi lona aiga i fea, Falealupo po o Asau, fai i ai e foi mai. Fai i ai o lea ou te tatalo atu e foi mai, ia ona talatalanoa lea i ai, tufa, faasoia, tuu i ai le tuualalo, valaau mai i Apia i Ofisa Sili o Pulega se i sui mai o lo o i ai le mea o lo o gafatia, e tatau ona faapena le tatou... E pei lava ona outou tatalo mai ma matou tuu atu le matou... tatou galulue faatasi. Ae o se tulaga lena, ae leaga le Minisita e ese lou fiafia i ai o le lelei o ana upu, e susua ana upu e faamalie loto, e taliagofie ia tai pei lava o le ad foi lea sa masani ona alu i le TV, o le tali filemu e malie ai le loto. Ou te talitonu ua fia tausaga o tuutuu atu, ae o le tatalo atu lena i lau Afioga. Alofagia le falemai o lenei itumalo e le i mafai lava e le 10 tausaga talu ai a o lenei lava e tuitui atu. Ma le agaga faaaloalo.

FOFOGA FETALAI: Saunoa mai lau Afioga i le Minisita.

Afioga Hon Lautafi Fio Selafi Purcell (Satupaitea): Lau Afioga i le Fofoga Fetalai...

FOFOGA FETALAI: Se i tulai mai le sui usufono mo Satupaitea.

Afioga Hon Lautafi Fio Selafi Purcell: O se manatu puupuu lava. E le i i ai lava se manatu e faalavelave i le saunoaga matagofie a le Afioga i le Minisita o le Falemai ma e sa tuu lava se i saausi lava lana saunoaga ona ou tu lea e fai sina mataupu laitiiti. Leai leaga o lea sa ou talanoa i le mataupu tonu lea ua laga foi i le fale o alii ma tamaitai fomai, lea ua fai si leva o taupule. Na ou oo atu la i le vaiaso atu i ona tua tau mai o la e ua o atu le au surveyors le au tenders e tilotilo. Ua faatumulia lenei foi sui usufono i le tulaga ua oo i ai, a o la e ua gaoioi. O lona uiga o la e ua sue ni tagata e faua fale. Ma e momoli atu ai lau faafetai pei sa ou fai atu foi i le aso na fai atu ai lau lauga. Leaga o la e faalogologo mai le ta itumalo, tau lava o sina au saunoaga, e lavea foi le falemai o Satupaitea, leaga o lea ua ou faalogo atu ua uma uma lava falemai o Samoa ae toe lava o le falemai o Satupaitea lea e te le i fai mai o le a fai le tou fale.

O le mea lona lua lau Afioga, o lea ua ou faalogo atu i le Afioga i le Minisita, o lea e taunuu mai wheelchairs, o lea ua tau mai atonu pe tai 10 a le falemai. Ou te talosaga atu ma lou agaga vaivai, aumai se isi 10 ma Satupaitea lau Afioga. O lea ua muamua alu atu le talosaga a Satupaitea i lau Afioga. Ia ma lou faaaloalo.

FOFOGA FETALAI: Ia, lau Afioga i le Minisita o le Soifua Maloloina.

Afioga Hon VALASI LUAPITOFANUA TOOGAMAGA TAFITO SELESELE: E ese lou fiafia e faalogologo i saunoaga a le Afioga i le tamaitai sui usufono. Ia, e faaloalo tele foi lou sui usufono leaga sa seei foi i le Kapeneta aemaise foi le sui usufono mo Satupaitea. Masalo e le i maua e le tamaitai sui usufono o lea e faamuamua lava i lau lisi. O Savaii, o Sataua, Safotu, Satupaitea. O Upolu o Lalomanu, Poutasi ma Lufilufi. O fale o fomai ma falemai. O lea ua manino, o lea ua faasolo i tenders ma ua tuuina atu i aao o konekarate. A lea sa i ai lau tala, afai ae manuia ma momoli atu le soifua ma le ola, e tatau ona oo atu ia Iulai ua faamalieina nisi o tatou falemai. O lea la e faafofoga mai lau Afioga i le tamaitai, ia, e tatou te gasolo lava i faatulagaga aemaise foi fuafuaga o tatou galuega. Ae manaia faafetai o lea sa ou taua lava i le faamanatu muamua, masalo po o le vave o lau tautala po o le le manino, a o lea pei ona ou fai atu i le amataga, o lea ua tuuina atu i tatou konekarate. O lea e molimau Satupaitea o lea foi sa tatalo mai i le tulaga o lo o manao ai le latou itumalo e faatu ai le... O lea sa ou fai i ai, afai o manao lo outou itumalo, o lea sa ou taua le septic lea sa i ai se i tulou a Satupaitea, o lea sa asiasi atu le Komiti sa aumai e le Komiti le lipoti, ma faagaoioi atu loa tagata. Leaga o le mea sa tupu, sa fai lava i le tomai o le itumalo, ae o lo o i ai inisinia faapitoa a le tatou Matagaluega. Ia ona o atu lea o inisinia faapitoa ia, o atu toe faataoto ma toe faalelei, lea la ua manaia ai le falemai o Satupaitea. Ae aua e te lua popole, o lea ua uma ona faatulaga, ae o tulaga uma lava pei ona taua, o lea sa ou talanoa atu i tulaga manino, aemaise foi le faagaoioiga o tatou tulaga ia pei ona tuuina atu. E le gata foi i wheelchair lau afioga i le sui usufono o Satupaitea. A foi lea sa e faafofoga mai, o lea...

FOFOGA FETALAI: Se malie lau Afioga i le Minisita, o le a le mataupu lau Afioga i le sui usufono mo... o se faafetai foi po o se...

Tofa Hon Faimalotoa Kika Iemaima Stowers-Ah Kau: Ia, lea e fia avatu leaga o lea sa ou faalogologo ma le totoa, sa faasolosolo foi lau Afioga i le Minisita ma tau le falemai o fea ma tau sui usufono ae le i tauina Safotu ma ta tulai atu leaga o lea sa ta lauga ai. Ae to lou pulou, faafetai, ou te le toe masalosalo o lea ua e saunoa ae o la e faafofoga mai foi si ou itumalo, leaga o lea sa matou talanoa nei ina ua fai le ti, ia o le a saga nofonono lava... pei sa ou faatalitali, e uma loa Tea... na muamua ou lauga i lo le tama matua ia Tea, ae le i tau maiga lota itumalo faamolemole. Ae momoli atu le faafetai tele i lau Afioga i le Minisita.

FOFOGA FETALAI: Ia, tulai maia lau Afioga i le Minisita.

Afioga Hon VALASI LUAPITOFANUA TOOGAMAGA TAFITO SELESELE: Na ala ona ou le taua, ou te musu foi lele ne i meaane ua agia ona te i lea ua faapea sui usufono, leaga o sui usufono ia ou te talanoa i ai, o sui usufono e le i manino ni falemai. E le i aumaia se talosaga aloaia. Ae pei o falemai ia ua tuuina atu, ia o lea ua lavea lau falemai i totonu o le lisi i tulaga pei ona i ai, ona ua aloaia i tulaga o le faagaioiga o tender, aemaise foi o tulaga ua tuuina atu i konekarate.

E le o toe tele se... Ona ou oo mai lea i le Koviti-19. Na ala ona ou faamulimuli i le Koviti-19, sa i ai fesili sa laga po o fea ua fai i ai le Koviti-19? A o le a se mea ua i ai a o i ai foi se tapenaga a le Matagaluega. E amata sau tali faapea i le mamalu o lenei Maota mamalu, e amata le siosiomaga o tatou i le faagaioiga o tulaga o le tatou Koviti-19. Silasila, ua nofofale ia Satuiamaa i finagalo ma aai o finagalo, le mea sa tupu nei i le Koviti-19 lea na oso. O le a le mea na i ai? E le taitai ona lava tapenaga a le Soifua Maloloina, o lea lava sa ou taua i totonu o le Maota lenei, ou te le i faalafia pe ou te fia lelei i le Matagaluega, ae sa ou tautino lava. O le uiga la o lau faamatalaga lea e fai atu, o le amataga o le foia o le Koviti-19 ia aua nei toe maua, o oe ma lou siosiomaga ma lou aiga. O le a e fesili mai la i le Matagaluega po o i ai se tapenaga a le Matagaluega, ae faapefea pe a oso mai oso atu i lou fale le Koviti-19 ae le oso i le Matagaluega? O le fesili ma le tali, e tatau ona lagona e sui usufono uma, ia tapena lou lotoifale, aemaise oe lava ma lou aiga, aua a oo ina oso le Koviti-19, e isolate lava oe i lou fale pei o le mea sa i ai. Ia e oo foi ina ua tatala malaga mai fafo, a maua le tagata e isolate lava i lona aiga. Ua alu alu o lea ua matagofie ma lelei tulaga uma.

O le taua foi o le isi variant fou, o lea ua aumai le pepa ia te au a le Matagaluega, o lo o i ai le mea sa aafia ai Niu Sila, o Fiti. Sa i ai foi tatou suesuega talu ai nei i totonu lava o le tatou atunuu a o fegasoloai mai o tatou tagata. Pe a ma se 3% na maua, o lo o aumai pea lipoti a le Matagaluega i le tatou Koviti-19 e le o toe maua se tagata tele, sona fuainumera i le tulaga e pei ona i ai. O lona uiga, o lo o aumai foi le fautuaga, o le puipiuua lava o le Koviti-19 pe afai e alu alu toe foi mai ia tatou, o le puipiuua lava o oe ma lou siosiomaga, aemaise foi tulaga e pei ona tatou i ai. O lea ua faamanino mai ua kava le tele o tatou tui i le Koviti-19 lava ma le faagaioiga o tatou tui, e ova i le 94% tui uma e lua ua uma ona faatino. E 65% le tui foi lele o le booster. O le 35% lea e taumafai le tatou Matagaluega ina ia tui uma ai tatou tagatanuu, o lea lava e taualaga le Matagaluega i le tui lea, ae afai ae faafofoga mai ua aveva foi lenei itula e tatau ai foi ona avatu se faamatalaga a le Minisita i le tatou atunuu, aua e te nofoai. O le tui lea o lea e faagasolo, e le gata i tua i tatou falemai i nuu i tua, ae o totonu lava o le tatou... o lo o lava le tatou tui o lo o i ai le 40,000 o le tui, ia, e taunuu mai le isi 30,000 o le tui lava lea o le booster i le masina o Mati i le tausaga nei. O lea la e faagasolo lava le tatou tui ma o lo

o taualaga lava le tatou Matagaluega i le tulaga o le puipuia o lou soifua pe afai e le i maua sau booster ia po o le tui lea mulimuli a tatou lea e i ai i le taimi nei. A o le laasaga o tui uma lea e amata atu i le 5 tausaga agai i luga le matutua, aemaise foi tatou uma o lea sa uia uma tui nei e lua i le taimi muamua e ese mai le booster, toeitiiti lava 100% le tulaga. O le ala lea o le manuia o si o tatou atunuu. Ana tupu mai le feoaiga lea mai fafo ma tatala tuaoi ae le i malupuipuia tatou, ou te iloa e tele lona afaina.

I le taimi nei, o lo o faagaioi... sa fai foi suesuega a le Matagaluega, o lea foi e faafofoga mai i le tulaga o le puipuia ma le... o lo o mataitu lava e le tatou Matagaluega tulaga uma. A o le talosaga a le Minisita, o le tapenaga mo le Koviti-19, o oe ma lou siosiomaga, aemaise o tatou o taitai o le atunuu, ia talai atu i tatou itumalo, aemaise o lo o ua tofu ma council, o tumutumu o itumalo, ia, e mafai ona tatou galulue faatasi ina ia faafoia le faafitauli o le Koviti-19 aua o lena ua outou silafia le Koviti-19. E le mafai le mafai. Ae o le mea malie ma le tala manaia, talu ona pisi le Minisita i le control ina o le Koviti-19, e le i i ai se taimi e tasi ua ou lavea ai i le Koviti-19. Ua ou fiu e taumafai ia ou Koviti-19, a. Ae tou te iloa le mea lea ou te iloa, o le toaga i le lotu, tatalo i le Atua, mama lou loto, aua ne i i ai ni mea foi ia e alualua. Ae leai la se vailaau foi lea. A o le uiga o lau tala, atoa ou tui, ae le faapea ua ou lavea i le Koviti-19. O nisi taimi e alu i le malae vaalele mo le gasolo mai ma mataitu ia... faapea lava nisi ailoga o le Minisita e pulou le ulu i mea foi ia e kava ai... a o le uiga lena, alu e filo ma milo ai, ae aua le... afai o le taitaiau, aua le tu i tua ae alu i luma, a. O lau tala la lea o lea e tau atu ia outou, amata atu i le Maota lenei, o tatou e taulamua. E ese lou faafetai i le sui usufono o Sagaga 2 le Afioga ia Maulolo ua tau le suafa. Na ona alu lava i tua o le polokalame a tatou, isolate le tagata i lona itumalo, na muamua lava fesootai mai. O le a le mea na i ai? Avanoa le faleaoga, avanoa nisi maota. O le ituaiga sui usufono e ese le manaomia i taimi o puapuaga. Ae le aoga lou lauga mai lauga mai po o le a se fofo a o le a se mea tatou te faia. O lau lui i le tatou Maota, o oe ma au e taulamua i le faafoia o lefaafitauli. O le uiga lena o le mea. Afai lava e oso mai le mai nei feoti uma le Palemene, e leai lava se isi e finau. Ae afai e oo atu i lou fale, tapena lelei mea uma, ia, leai se mea e faaletonu. A ua malupuipuia faiga a le Matagaluega.

Na pau lau tatalo, o lea foi na ou talanoa i le Ofisa Sili, ua tataua ona toe faamamalu le tatou mask i mea faitele. A o le mea ua tulai mai ma le maitau a le Matagaluega, e le usitaia e tagata, pei foi lele o se mea e ula i ai. O lau la lui ia i tatou ma o lea foi ua ou talosaga i le Matagaluega, o lea foi ua ou talanoa i le Ofisa Sili ma le Matagaluega, aua ne i faaulufaleina se tagata i le falemai pe a leai se mask. Na ou i Niu Sila ma sa ou i Filipaina, ma Fiti talu ai nei, e ese le usitaia e ia atunuu o mea faitele, o le mask lava. Faamolemole le tatou Palemene, ua ou lui ia te outou, tatou faataitai toe fai mask i taimi e tumutumu ai, aemaise lava mea o maliu, o faigalotu, o mea

o faauuga, o mea tetele faapena, o mea lava na e tatau ona i ai. E pei la o le tali atu lea i le fesili po o tapena le Matagaluega, ua leva ona fagufagu le Matagaluega o ai e le i tuia, e le i faia le tui, ia sau i le falemai. A o le mea lea e tulai mai e pei e amuamu lava, e pei o uiga o le sui usufono mo Faasaleleaga 5 a fai atu le tala e soisoi lava. Ou te le iloa pe soisoi fiafia pe soisoi lagolago, pe soisoi lotovale i le mea lea e fai atu.

Afioga Peseta Vaifou Tevagaena: Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita leaga o lea ua taua le suafa o Faasaleleaga 5.

Afioga Peseta Vaifou Tevagaena: Pau lava lea o le Minisita a saunoa mai, e ese lou fia faalogo i ai leaga e ese le manaia o lana saunoaga. Ua ou manatua ai le taimi e saunoa ai le Minisita o Faatoaga, I am free, this is our time. O lea la ua saunoa le Minisita i le mea lea o le puipuiga, faafetai i lau Afioga. Ae malie lau Afioga a e saunoa... ua ala ona ou ata, masalo a e silasila mai i si ou uso a sui usufono, o lea o le a fai la mask. Na e saunoa loa i le puipuiga, o lea o le a tapena foi lenei Vaega. Ua e vaai i ai i le usitaia tele e lenei Itu o lau saunoaga? O le mea lea lau Afioga i le Fofoga Fetalai, se leaga e amanaia e lenei Itu le saunoaga a le Minisita. Faafetai i lau Afioga.

FOFOGA FETALAI: Malo. Lau Afioga i le Minisita...

Afioga Hon VALASI LUAPITOFANUA TOOGAMAGA TAFITO SELESELE: Ia, o le tala na avatu, o la e faafofoga le atunuu, o tatou o taitai e taulamua, talai atu, e pei lava o le talaiina o le talalelei. Talai atu i le tatou atunuu ia le faiga o le Koviti-19 ae aua le fesili mai po o le a le mea... E le handle ina na o le Matagaluega le Koviti-19. Faamolemole, o le agaga lena ia tatou galulue faatasi uma, amata lava i le fufuluina o ou aao, ia taumafai, aua o isi lava o tatou e le kea, e le fufuluina lima. A o le lu'i ma le tala e tuuina atu, amata faapena, ona e iloa lea e saogalemu. E pei ona ou fai atu, ua ou fiu e fia Koviti, ou te le Koviti, a mama lou loto, e afua mai i totonu. Aua ne i e masalosalo i tala ia e fai atu, aua a lelei mea uma, e matua selau pasene.

FOFOGA FETALAI: Ia malie lau afioga i le Minisita se i tuu atu muamua i le Taitai o le Itu Agai ona tuu atu lea i lau afioga i le Minisita.

Tofa Hon Lauofo Fonotoe Nuafesili Pierre Lauofo: E faafetai i lau afioga i le Minisita o le Soifua Maloloina, faafetai. Ioe, o le mea lava lea sa ou taua ai foi lele i le faamalo i faalauiloa ma faasalalauga lea e sau i luga

o le TV. E le o malolo lau Matagaluega. O lea lava o lo o tata logo pea Masefau i le atunuu, sauniuni ma tapenapena mo tulaga faapena. Ae pei o le mea lea sa tau agai i ai le sauniuni, tapenapenaga, mo taligamalo tetele lea e loma. Pei o i ina lea sa agai i ai se fesili, a o totonu lava ia o le tatou lotoifale o lena e saolele lava lau saunoaga, e leai se mea o faaletonu.

E oo foi la i le tui aua e i ai tatou o lea ua uma le booster lona lua, ua fa ai tui. Aua e pei o lea sa fesili, aua o lea e maua lipoti i isi atunuu, e pei ua 5 tui. E po o le a se faamalamalaga a lau afioga i lea vaega. Pe ua tatou sauni e laasia lena pe o lea e lelei i le taimi nei lea vaega. Ae malo faafetai i le tulaga o le le aafia o lau afioga i le Koviti, e sao lelei, mama le loto ma mea uma. O lea la e matau atu foi le Maota, ma lenei foi itu, e na o lau afioga lava o lena itu e le i maua i le Koviti, malo faafetai.

FOFOGA FETALAI: Se i tulai mail au afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: Ioe, ua taua tele foi le saunoaga a Dr.Valasi i lenei taeao. A o lau vaai se i fautua lava i sui usufon lea faatoa ta tui ifo nei a latou mask, e pei lava e sese le mea la e u i ai le mask. Na saunoa le tofi o Palauli 1 i le nofoaiga lea sa saofai mai i le itu le la e i ai Leaana, a sese le uuga o le mask e faaletonu ai lou mafaufau. E na ona ou faapena atu, ona ua vave tele ona ta sulu mask a le aualii le la, ona o le usitai ona o la e tau fai o latou falemai, po o le sao lea lau afioga i le Minisita.

FOFOGA FETALAI: Ailoga lava o le a se mea o le a e tau saunoa mai ai, ia saunoa mai le sui usufono mo Safata Nu 1.

Afioga Leaana Ronnie Posini: Na saunoa le Minisita o Faatoaga, ae o lea ou te tulituliloa le saunoaga a le Minisita o le Soifua Maloloina, e faapea o ia e taulamua, o le taitai, e muamua lava tui ana mea faigaluega ma tulaga o le soifua maloloina. O lea na fai le faatonuga e fai le mask, a o lea e leai se mask a le taitai. Ma le faaloalo.

FOFOGA FETALAI: Tulai maia lau afioga i le Minisita e faamaea mai lau saunoaga.

Afioga Hon VALASI LUAPITOFANUA TOGAMAGA TAFITO SELESELE: E faafetai i le sui usufono o Safata, e ese le usitai i lau upu e fai atu. Na ou tautala loa i le mask fai loa, ae le faapea ua fai atu, aua o le taimi lenei o lea e sefe. O le saunoaga a le Sui Taitai, ia faafetai i le Sui Taitai o lena Itu e moni ma faamaoni. O le tulaga i taligamlo o lo o i ai foi fuafauga a le Matagaluega. E le mafai le mafai ona faatamala i tulaga e pei

ona i ai na taimi e pei ona tatou agai atu i ai. E le gata foi i lea o le tulaga e pei ona laga e le Susuga po o le Afioga i le Sui Taitai, sa saili lava i le tulaga o tui.

Lau afioga i le sui Minisita, afai ua 5 tui na ua tui ai oe, ia o le a saga tou lava na tui e 5? Tatou te le i taitai ona oo...ne i mea ane ua ova le vailaau i totonu o lou tino, ona te i lea ua ...ae aua tou te mateletele soona tui tou tino. E pau lava le mea lea tatou te i ai, o lea tatou te i le taimi o le booster lea tatou te i ai. O le 35% o le tatou atunuu e le i tui. A outou silasila i le mea lea e tupu ia Samoa, e na o Samoa lava i le taimi lea na uma nei i le Kirisimasi ma le Tausaga fou, o lea foi tou te faalogo i le Tala o le Tupe, aemaise le tala e pei ona i ai le tamaoiga. E tasi lea aoga, aua ou te sau au i totonu, o la e taloka uma le tele o mea. Ae complain lava foi lo tatou Maota, o le a le mea e le tatala ai. Ae o le agaga lea, e fautua i le sui usufono, le Taitai o lena Itu, e aua le soona tuia ia tui i lou tino. E tasi lava le tui lea e faaalu e tatou, ma o le mea la ua i ai nei lo tatou atunuu, e fiu tagata e malaga mai...

FOFOGA FETALAI: Ia malie lau afioga i le Minisita o le Sofua Maloloina, se i tuu atu le avanoa i le Minisita o Galuega Tetele.

..Tofa Hon Olo Fiti Afoa Vaai: Ioe lau afioga i le Fofoga Fetalai, ua ou fia malamalama ona o lea foi ua saunoa le Minisita po o le alii fomai i tui. A faapea ua 5 tui o le Taitai o le Itu Agai lea ua tofia, e faamanatu, e i ai tui lea e amata ai ona faasolo i o i le faamasinoga. E pe le o le tui lena o lea e tui ai le Taitai o le Itu Agai lea pe a?

FOFOGA FETALAI: Tulai mai lau afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: E faamalulu atu ou te le iloa, ou te le o agai foi i se faamasinoga. Ou te le iloa la po o a tui na e masani ona...ou te iloa o la e silafia e le Minisita o Faamasinoga. E leai e le o se tala e avane ai lau tala, o lea e maua lipoti i isi atunuu e faapea, o lea ua faasolo ia le lona 5 o tui. A o le vailaau foi lea ou te vaai atu i lipoti, a faapea o le umi o le taimi ua amata foi ona vaivai le vailaau. Pei o le mafuaaga lena o le toe fai o isi tui. Ne i te i ua faapea e tasi lua, lava loa ua uma, leai e le faapena le mea lea ou te faitau atu ai i lipoti. A tasi, lua tausaga ua amata ona vaivai ma mou atu le malosia o isi tui na fai, o le mea lena e mafua ai ona toe tui. Ne i te i ua tatou tuai ae toe fai nisi tui ae toe oo mai le faamai, ona faaletonu lea o tatou, ae le faapea o se fiafia e tui, ma tui, ma tui. Ia o le toe pue atu lea i lau afioga i le alii fomai.

Afioga Hon VALASI LUAPITOFANUA TOGAMAGA TAFITO SELESELE: E le tali ese lava le talitonuga lau afioga i le Sui Taitai, e

moni ma faamaoni. Ae o le mea o lo o aumai e tatou fomai, lea o lo o taulimaina lau pepa e makaina..e le mafai ona ou le fesili i fomai. O lea la e aumai le faamatalaga, o le tatou booster lea e aumai nei, e 65% o Samoa ua uma ona tui ai. E 35% lea e tulituli. A maea le tolusefulu lima pasene lea, aua e le o toe i ai se isi tui o aumai i fafo e ese mai tui ia, o le ala lea o lou fai atu. Ma ou te le o finauvale foi i le mea lea o lo o aumai e le ...e moni lava le Sui Taitai. Afai o Ausetalia, o Niu Sila, aua tou te faataitai fua i ai, ne i te i ua ova atu i le lua, tolu tui faapea, ae uma ane ai se isi. A o le agaga o lea e faafofoga mai le Matagaluega, o le a i ai foi suesuega ma sailiiliga, ona fai foi lea i le agai i luma tatou te agai i ai, ae faafetai.

Lau afioga i le Fofoga Fetalai ua tulai mai ua maea mea sa laga, ma ou te talitonu foi, afai e i ai se sui usufono ou te le i tali atu i ai, tusitusi ane i le pepa lau talosaga ma tuuina atu i le ofisa.

Ona faapea lea o se tala lau afioga i le Fofoga Fetalai, ou te toe foi lava i lau Matagaluega. O le tapuaiga a le Matagaluega ou te faafetai atu, ua malo faafetai i itutino uma o le Matagaluega, aemaise Faauluuluga, o lea ua tatou... e pei ona tatou feiloai ina ua tatou feiloai ma le tatou pule fou, o lau talosaga ia lagolago le tatou pule fou. Aemaise o le a lava le tulaga e i ai a tatou galuega, ia tatou faalogo. Ua uma ona fail au tala i le pule, o lau matafaioi o tagata faigaluega. O lau matafaioi o le faiga o faaiuga ia sao ma ia lelei. E le aia fua le Minisita i tagata faigaluega seia vagana ua i ai ni mea e ono fesetaiai ma manaomia ai le fesoasoani. O lea foi e faafofoga le Matagaluega, e faapena le tulaga e pei ona i ai lau Matagaluega pele, i ona itutino uma, o le NKF, o le Iunivesite o le OUM aemaise tagata faigaluega uma ma latou e faauluulu i ai, ma le Ofisa Sili ma Ofisa Sili Lagolago o le tatou Matagaluega, seia oo lava i ave taavale, sikulaki, o cleaners, ia oo atu i ai le Agaga o le Atua. Sa ou lotu i Vailele i le aso Toonai na tea nei, ona o e valaau a le Atua i se tasi o avetaavale a lenei Matagaluega. Afai o faafofoga mai le faletua ia Faia Rudolf Nauer, o lea sa valaau le Atua, ma e le mama ia te au tulaga o le agai atu tatou faatasi, tatou ootia faatasi i le tulaga e pei ona i ai. Na uma lava le lotu tuu lau meaalofa i le faletua ou solomuli mai. O le agaga taua ia tatou amo faatasi le avega o le lotu mafatia. E le manatu mama ia te outou o tauaveina taavale a lo tatou Matagaluega. Ia manuia outou faia, ia outou faalogo i le Ofisa Sili, o le mea e fai atu ai le Ofisa Sili o le mea lena e fai, aemaise o le Pulega a le Matagaluega. Le au sekulati. O lena ua outou vaavaai, o lo o taumafai mai le Minisita e saili main i mea foi ia e talanoa atua i le isi itu i le isi itu, o ualesi. A maua nei mea, e ese le taua, aua e taua tele mo le galuega a sekulati. Aemaise o cleaners ia fufulu lelei o tatou fale, e i ai le taimi taua o le a faataunuu atu ni asiasiga.

Mo le silafia e lenei Maota e pei o sui o Tamaitai e pei ona lauga, o le aso 3 ma le aso 4 ua faataunuuina ai ia asiasiga, a lau fono faufautua ia taamailo i falemai uma. E faatoa alu atu ai foi le Ofisa Sili i fale ia, ina ia

asia ia tulaga e pei ona i ai, mea sa talanoaina, mea o fautua mai ai ia sui usufono, o lea ua faailoa atu. E le o ni taigasua, aua o le mea lena o lea ou te popole ai, e le o ni taigasua. O le 3, e so o i inei i Upolu i falemai e vaai i latou ma fautuaga ma mea uma e tulai mai. E le mafai foi ona le oo i Fagaloa ona o faaletonu o tulaga e pei ona i ai. O le aso 4, o Salafai, leaga ne i mea ane ua tu ae le sui usufono mo Satupaitete le fiafia i le le tau atua o asiasiga nei, a o asiasiga taua. E taua tele le taamilo atu, ia tulaga nei. E uma loa fonotaga faapenei, e ese le taua, o le asiasia o nuu ma alalafaga falemai itumalo, aemaise foi o aga a fomai.

Ona ou faapea lea, ou te faamalulu atu, avea lou sui e fai ma sui o le Matagaluega, afai o le a se auauna ua lape, e leai lava se faiva e asa ma sona maumau. O le a foi se silasila i nuu i tua, o a ni gagana ma ni tu a alii ma tamaitai tausi soifua ma fomai, e faamalulu atu. E matou te talitonu lava e poto lava le tautai ae le atoa ia i lona sa. O le agaga lea, sui mamalu e, o le a se auaunaga a le Matagaluega, ia vivii i le Atua, ia viia ai le Atua ae le o le tagata.

ONa faauma lea o sau tala, se i ou toe afe lava i si ou itumalo, Vaisigano 2 ua outou faafofoga i la outou sui usufono. Sa tatou mafuta i le Kirisimasi male Tausaga fou i la tatou lotu tuufaatasi. Sa i ai foi a tatou fesootaiga, o le agaga ia tatou maua pea le mafanafana o le Atua i tatou fesootaiga. Afai o i ai se isi o le itumalo o ita i le sui usufono, ia tootuli i le Atua ma faatoese, e faamagalo le sui usufono, ou te faamagalo foi ia te oe. Ou te talitonu o le tatou itumalo e ese le fiafia, e ese le taua i le Kirisimasi foi ma le tausaga fou e pei ona oo atu faamanuiaga, aemaise foi aufaigaluega a le Atua i le itumalo atoa. Lau susuga i le toeaia aemaise foi o faifeau, lau susuga i le Patele, Epikopo po o ai lava o lo o asuina le ipuvai o le Ola i totonu o le itumalo, malo galulue, faafetai tele i tulaga e pei ona i ai.

O lea ua uma le lauga a lo outou sui usufono, o a outou faamanuiaga e manuia ai ia le sui usufono o le tatou itumalo. O ou moomooga ia faafoi e le Atua ia le manuia, ia maua lo outou malosi aemaise le aufaigaluega paia a le Atua faletua ma nofoaalo, o le tagata ese i totonu o tatou eleele, ae talitonu o lo o soifua pea le Atua. Ona faapea lea, ia manuia tele outou faiva, faafetai i lo tatou nuu ma le itumalo, tatou malaga i lenei tausaga, ina ia aua ne i i ai se popolega i tatou poloketi o lea lava e lagomalu mea uma ma o lo o i a foi fuafuaga. Tatou te toe feiloai vave ma saina ai loa le tatou miliona lea. O le isi mea i le tou matau mai i le tatou itumalo, ua siisii a i luga le tamaoaiga o Samoa ua leai se mea e toe popole ai. O le ala foi lea o le tali atu i falemai eseese nei, ou te talitonu a vave mai talosaga a itumalo nei, e ofi i totonu o le Tala o le Tupe lea o le a fai nei, ia outou tulaga uma nei. O le agaga lea, ia Samoa e, o la outou tapuaiga i so o se vaega i so o se tafa, tumutumu seia oo lava i so o iu tagata ia faamanuia tele le Atua i la outou tapuaiga. Aemaise foi o nai ou aiga faalogologo mai i atunuu mamao, o le ala lea o le taumafai atu, afai o outou silasila mai, ia alofa mai, tatalo,

aua na o le tatalo, a ia taumafai ia fesoasoani mai e tele galuega a la outou sui usufono, aemaise o tulaga uma.

Faafetai i le Sui Minisita ia Tea ma si ou uso ia Foisala, malo mo le galuega, faafetai Tea o oe o le tagata matua e faalogo lava i ai, faafetai tele mo fautuaga, faafetai mo le timai, aemaise foi o le faafofoga a Samoa i lau lauga.

Le tatou Matagaluega i ona vaega uma, ia ola maloloina le sui usufono, soifua ma ia manuia.

FOFOGA FETALAI: Ua taliga i fialogo le saunoaga a lau afioga i le Minisita o le Soifua Maloloina. Atonu e tele foi ni finagalo na faaalua na lagalaga foi e sui mamalu ona o le taua o le Matagaluega aemaise le auaunga o le soifua maloloina o le atunuu lautele. O le mea lea, faafetai tapena i le afioga i le Minisita aemaise foi o le Pulega ma le Matagaluega aua foi mea sa lagalaga i finagalo o sui mamalu o le atunuu, aua lava le soifua maloloina lautele o le atunuu, i ona puipuiga. O le mea lea malo galulue faafetai tapena, aemaise foi o fuafuag ma faamoemoe mo nisi o itumalo na talosaga mai. Malo faafetai i lau afioga i le Minisita.

O le ua oo mai le tatou faasologa i lau afioga i le Minisita o Galuega Tetele. E talitonu foi ua tele ina tali mea sa finagalo i ai sui usufono o le Maota. Ae lafo atu ia i lau afioga mo lau saunoaga.

Tofa Hon OLO FITI AFOA VAAI: E faafetai atu i lau afioga i le Fofoga Fetalai, ua maua foi se laolao se i faailo se uga o le tuavao i se tautua le au, ia te au nei ma Ofisa sili o Pulega. O Pulega taitasi e iva, o le vaega lenei o le matua tele tele lava, e faaopoopo i ai ma Samoa atoa. Se i fai ai se matou tala e tusa ai foi ma le faamoemoe i le Tala Faaopoopo o le tupe a lo tatou malo.

Ua tatou molimauina faatasi le agalelei ma le matagofie o le Atua i lenei taeao. E faatalofa atu ai i lau afioga i le Fofoga Fetalai, ma faafetai atu ai foi, aua o le ua motu i vasa le suigaula nai le papa. E sula ma faafetaia ai le agalelei o le Matai Sili ua tatou fetai ai i magafetau soifua i lenei taeao. O lea foi ua tatou oleole ai lona Mana ina ia afio ma tatou fono faatasi ma taitaia la tatou folauga i lenei tausaga.

E faatalofa atu ai i le Tamaitai Palemia ma uso a Minisita o lo o siigasegase, ou te talitonu o lo o outou faafesagai lelei ma tv i le taimi lenei. E i ai le manatu o manuia mea uma. E faatalofa atu foi i lau afioga i le Sui Palemia ma le paia o le aiga Kapeneta, o vasega i Minisita Lagolago.

E faapena ona oo atu lau faatalofa i le Taitai o le Itu Agai ua tofia ma faamauiina, i faamaumauga a lo tatou Palemene faapea foi i le sui Taitai. E faatalofa atu ai i foi i sui mamalu o le tatou Palemene, o lupe lava ua faia mai le fuifui, e tulituliloa se mafua manogi aua Samoa nei ma e lua.

E faatalofa atu foi i lau afioga i le Failautusi mamalu o le tatou Palemene, le sui Failautusi faapea foi ia le Ofisa o le Fono Aoaofaitulafono o le Malo Tutoatasi o Samoa.

E fiafia foi e faatalofa atu ai i le paia i Ofisa Sili o Pulega o Matagaluega ma Pulega Tumaoti o le tatou Malo ua mafai ona tatou faatasi.

E faapea foi ona faatalofa atu i lo tatou atunuu i le mamalu o le aufaipisinisi o lo o lagolagosua i le tatou Faigamalo.

Lau afioga i le Fofoga Fetalai, e faatalofa foi i lenei taeao i le paia maualuga o Samoa, amata mai lava i mauga maualuluga seia paia mauga iti. O paia ia e i ai le taofi o le a ou le toe aofagaina le laau ua maea ona ta tulaga. Pe ou te toe tau utufia foi matapuna nai atumauga ua iloga ona ala, ua manino foi ona toa. Ona i ai lea o le manatu, o paia ma mamalu, o le paia o le tatou atunuu i ona tulaga faalupe, o le a nuunuu atu ia i le usoga a Tumua ma Pule, aua le latou fatuaiga tausii.

Lau Afioaga i le Fofoga Fetalai, e ui lava ina na o le tasi lava le Pulega mai le iva o Pulega ma le Matagaluega e tasi o lo o ou galue ai, o lo o aumaia ai se vaegatupe ia latou fuafuaga i le Tala Faatatau faaopoopo lenei o le tupe. ae ou te matua faatauina lava ma amanaia la outou faamaite a outou afioga i sui mamalu. O faamaite iae matimati ai so matou faatauavaa. O tuualalo foi a outou afioga, ua faamauina ma fesoasoani i so matou vaivai. O le upu moni lava lau afioga e malie i le faalogologo,ua o se fisaga agi malu la outou tofa saili, ma la outou faalelegafulu ua avea lea ma o matou oso i le tatou malga i le amataga o lenei tausaga.

Lau afioga i le Fofoga Fetalai e pei ona fai atu sau tala, e le avea le leai o se matou tupe faaagaga, e fuli atu ai o matou tua i le mamalu lea. E leai se mea o misi i lau faalogologo ma lau faamaumau, afai foi e misi ia te au, o lea o lo o affio mai Ofisa Sili o Pulega o Matagaluega o lo o fesoasoani mai i lau galuega.

Lau Afioaga i le Fofoga Fetalai, e taua ia tulaga o mataupu sa laga e sui mamalu. A o aga masani a lenei aiga po o lenei Sector, o le taimi lava e saunoa mai ai sui i totonu o le Maota lenei i so o se mataupu, o le taimi foi lena e faatino ai. O lena tou te silafia o lo o soo Samoa, i le auunaga o lo o faatino pea auunaga e oo mai i le taimi lenei. Ma o le isi foi aga masani a lenei aiga, e maea loa se fonotaga ma matou faamaumau i soo se mataupu, agai loa le matou asiasiga e asiasi ia tulaga uma ia. Ona faapea foi lea ona matou faamaumauina ia le tulaga o le faamuamua, lona lua, lona tolu, lona fa, o aga na. atoa ai ma le toe asia atu o nisi foi o matou galuega o lo o faagasolo ma ni fuafuaga foi sa faataatitia o lenei tausaga faaletupe.

Lau Afioaga i le Fofoga Fetalai, ae sili ona ou amata atu i nisi o galuega ma polokalame aemaise foi o poloketi ma atinae tuufaatasi lava. O Pulega taitasi uma lava lenei, atonu e tali atu ai foi ma nisi o fesili. E mafua ona ou talanoa atu e faailoa atu, se i outou matauina foi ma outou faafofoga i le tulaga ua oo i ai se taumafaiga a lenei foi vaega.

O le a ou amata atu i le Kamupani Vaa, Samoa Shipping Cooperation. E faafetai tele atu i sui mamalu sa faaalua lo outou agaga faafetai i se auaunaga faatauvaa a le tatou kamupani, aemaise lava i le vaitaimi o aso malolo. O se galuega tatou te viia faatasi ai le Alii, pe afai ua faamalieina se auauna vaivai. E momoli atu le agaga faafetai i le mamalu o le tatou atunuu, i le galuega lenei e le faigofie, le feagai o nai tagata faigaluega ma le atunuu atoa. Ae sa maua lava lo outou lava papale ma le tou galuega foi sa lagolagoina ai se auaunaga. O upu lava ia a le atunuu o le tai ma lona taaga, atonu e oo atu foi i se isi taimi ua atili na siitia ia se auaunaga.

Lau afioga i le Fofoga Fetalai e i ai nisi o sui usufono sa o latou faaalua le taugata o le soifuaga. E sao lelei le tulaga lea, na i ai lava le manatu ma le tatou talitonuga ma e faamaonia foi. O se tulaga o lo o aafia uma ai le lalolagi atoa, a o le fesili e tulai mai, e mafua i se a? O lea ua uma ona talanoa sausaunoa foi o Minisita, sa talanoa i mafuaaga pitosili ona ogaoga lea e i ai i le taimi lenei, o le taugata o le feaveaiga o oloa po o freights. O lo o charge ai tatou e le tele o kamupani vaa. O le mea moni lava ma faamaumauga, o le luasefulu futu container lea sa i ai, o le tolu tausaga talu ai sa tolu afe valu selau tala Niu Sila. O le taimi lenei ua fitu afe selau limasefulu, o le tele ia o le siitaga. E oo foi i le fasefulu futu lea e avatu ai pea se faamalamalama ina ia manino, sa 9,000 i le 3 tausaga talu ai, o le taimi lenei ua 13,280,000. E mafua ona ou avatu faamaumauga nei ina ia matua silasila totoa i ai i tatou, e le gata i le Faigamalo, ae o lena foi itu o le tatou maota i la outou tuualalo ma la outou faasoia. E mafai ai ona i ai, leaga ona o le mataupu tatou te agai uma i ai, e sue se fofu aua lo tatou atunuu. O le tulaga la lea ua agai i ai lenei itutino o lenei foi Pulega, e fai se fuafuaga i le tulaga lea o freights ma ae ai se tofa, e tuuina atu i le tatou Kapeneta ma le Faigamalo, ua tataua loa ona tatou tilotilo i se tatou vaaoloa. E pau lena o le fofu, ma ua uma ona fai i ai suesuega a afioga i Ofisa Sili o le Pulega atoa lenei. O matou mataupu faapenei, e le fai toatasi e se Ofisa Sili e fitoitonu ai e galulue ma faasoia atoa lou matou aiga maua ai laia o manatu lelei ma e iai foi le talitonuga o le fofu lea o le mataupu aua e taumate i le ete ia le tulaga o le suauu lea fesiitai iai e taumate le ete e oo atu foi le isi masina ua toe sii i luga le tau o le soifuaga ao lea ua tatou amata tapena i se tulaga e foia ai le faafitauli lenei o le aoga foi lea lau afioga ile fofoga fetalai o le silasila o le Pulega i se tatou lava Vaa aua o le upu moni lava a faapea e manuia ma talia e le kapeneta le faamaite lea o le vaa lenei e faaauvaa atoa lava e alo ma fanau o Samoa ile tulaga o faamaumauga pei ona galulue le Samoa Shipping Services ile tulaga o le faaauvaaina ia ma avatu ina o tatou alo ma fanau e galulue i luga o Vaa oloa ma vaa laupasese meli ia lau mai e tusa nei ma le 435 alo fanau o lea ua mafai ona galulue i kamupani fafo ile galuega lava lea o le galulue i luga o Vaa sami lea foi la e mautinoa ua amata ai foi ona toe siisii i luga ia remittances i le galuega lea faatino e tatou alo ma fanau o le isi foi itu e

fiafia foi e faamatala atu ia tulaga nei faapea pe faafefea pe iai ni kapeneti ua iai kapeneti Samoa o loo galulue i isi Kamupani vaa i Samoa lea foi ua oo mai ia te au lo latou agaga fia tautua ia Samoa e toe foi mai pea faapea o le a iai se faamoemoe o le tatou malo ise tatou vaa o oloa, o le isi foi vaega lau afioga ile fofoga fetalai faatoa uma ia le lockdown ile 3 tausaga o tatou malolo , malolo ma pisinisi ae na pau lava lea o le pisinisi e le mafai ona taofia nao le pau a lea o le pisinisi o le felauaiga o oloa, felauaiga ai taumafa e mai lea atunuu ma lea atunuu tasi na vaaiga sa faaosofia ai moealuaga i se matou manatu vaivai ona o le pisinisi lea e le gata o tupe maua o le tatou malo ao faapena foi o lea faaopop ai foi ia galuega mo le tatou atunuu . Lau afioga ile fofoga fetalai o le tulaga lea poo ua oo mai le tatou vaa foi lea o le Fotu Samoa talofae i si vaa , ua lalata ile 30 tausaga o tautua le vaa lenei ma e tasi lenei vaa o loo tele le tatou tupe maua mai ai ile faiga lea e togipauina ai e le malo o Amerika Samoa ia faapena foi ia le atunuu o Tokelau i tulaga uma lena ma o lea foi la ua iai le faamoemoe o lea saili sina seleni ia e suia ai le tatou vaa lea o le Fotu ou oo mai lea ile Pulega o Malaevaalele e iai se mataupu taua foi na laga e le afioga o le taitai o le itu agai a iai se avanoa foi lea e lele atu ai le Fiji Air Ways iinei Samoa i Aukilani poo Uelintone Niu Sila manaia ia sa fesilasil i lou mafaufau o le tulaga lena ona nao le Air New Zealand o lea agai mai, ae lau afioga ile fofoga fetalai e faatoa mafai ona faia le vaega lenei pea faapea e fai se join bench a le Fiji Air Ways ma le tatou airline Samoa ona avatu laia o se latou talosaga e filifili ai ma faia mai iai se faaiuga poo se finagalo a le Matagaluega o le Transport a Niu Sila e pei ona lava na masani ia o lea ua lafo atu foi ile tatou kamupani vaalele ia lena tulagva e manaia foi ona amata foi ona faatalanoa lena vaega e tutusa lelei lava ma le mea lea agai ma talosaga mai ai nisi o kamupani vaalele ile tatou transport sector i totonu o le tatou matagaluega ia faapena ona iloilo pe mafai ona malilie iai le tatou airline i tulaga faapena ae ose mataupu e taua o lea foi ua faafogafoga mai ia le Minisita o loo tauavea le vaega o se faamaite foi ma se tulaga faapena e mafai ai ona agai i luma ia tulaga o feoiga o le mamalu o le atunuu i vaalele e pei o le tulaga lava ia airport authoritysa faamauina i faamauamauga a le tatou malaevaalele le 121,547 pasese mai ile 4 masina talu ai le aofaiga lena o tagata sa agai mai totonu o Samoa ma toe felelei atu ma atoe agai atu i latou atunuu poo fafo , lea sa faamauina ai le maoae o e sa femalagaai i totonu o Samoa o se matautia foi lea i lau faalogologo atu talu ona fai le tatou ave le tatou malaevaalele faleaolo ma international airport e fua i femalagaina tagata turisi ma o tatou tagata ae mafua aise lau afioga ile fofoga fetalai ? mafua i le sao atoatoa o le fuafuaaga o le tatou faigamalo ile taumafai lea faatele mai vaalele aua o le mafuaaga tonu a lena na siitia ai le tulaga lea ona ua tele mai vaalele i le fuafuaaga o lena la ua outou molimauina 4-5 flights i aso uma e lei masani ae lau afioga ile fofoga fetalai o le tulaga lena sa agai iai

mafaufauga o le tatou malo ia tele avanoa e faimalaga mai ai tatou tagata ma atili ai ona taugofie le pasese e le natia ile tele o tatou tupe maua mai ile taimi lenei o le Kirismasi ma aso malolo aua e iai fesili a nisi foi oa ni manuia ma ni tulga o ni tupe maua mai i totonu i le malaevaalele o lau talanoa ile nmea lenei lau afioga ile fofoga fetalai ina ia manino ai le atunuu ile mafuaaga na fuafua mamao ai e lo tatou malo mea nei . E tele tupe maua mai tauala mai ile tatou Pulega o Malaevaalele tatou landing fees , miliona ma ona tupu le tausaga le faaaogaina o le tatou apa e space lea luga atu ile 244ft tulaga faapena lea sa fesiligia ai e iai le tatou se tasi o sui sa fesiligia o lea ale tatou tupe maua ai pe ona maua ai ni tupe? Ua leva ona maua tatou tupe miliona ile tausaga e maua i luga o le tatou air space e oo foi la ile tatou lower air space o la foi e charge foi ia vaalele agai mai i lalo mai o le 244ft ile faaaogaina o le tatou malaevaalele maua ai foi sia tatou 200 afe roughly i le tausaga ia tasi lena vaega tupe o le faaaogaina foi e airlines ia agai mai ole tatou security la iai i o anoano foi miliona ile tausaga ile tatou pulega Malaevaalele poo airport tax tasi lena alagatupe ile tulaga foi lea i ground handling le aua tuuina atu ile tatou Samoa Air Ways tasi lena o tupe tele lava a le tatou Malo o loo maua mai ai ae na pau lava le faaletonu o lea la ou talanoa atu ai ile 1 milionalea sa ou tatalo ai sei faatau ia ni tatou masini a faapitoa e faatino le auaunaga lea load ma unload ai le tatou vaa i lena ua outou faafofoga ile mafuaaga sa delay ai le tele ai o flights sa faitio mai ai foi e mafau ona delay flights ia mai le taimi o aso fiafia sei vasega le taimi o Vaa ona nao le 2 palau sa iai ile malaevaalele ile tapenagaga sa fuafua ile tulaga lea mai a le taimi mai le fia sefulu tausaga talu nao le 2 lava palau e faatino ai le vaega lea o le mea la lea ou te faiatu ai sau tala lau afioga ile fofoga fetalai o mafaufauga ma fuafuaaga o le malo lenei e le taua se vaalele e aumaise tasi ae taua le tele mai o vaalele tele ai foi ma tupe o le malo , molimauiina foi le afioga ile Minisita o Tupe le siisii i luga o tatou tupe maua ao le tatou Pulega o Malaevaalele lea ua ou faalogo atu i le tulaga siitia mai le negative 6 ile 4.7% le siitia ola , o le isi la tele o pasene lea na maua mai o le malaevaalele lau afioga ile fofoga fetalai ia ona oo mai le ile Pulega o Uafu ma Taulaga poo le tatou Samoa Ports Authority lau afioga ile fofoga fetalai ma le mamalu o le maota o le Pulega lea i totonu o lau sector ou te faaigoaina o le Pulega Milionea o lea Pulega lea na ua outou silaisla ile tele o latou polofiti e maua i lea tausaga ma lea tausaga toetiti a tai 10 milion ao isi mea , ona o le manaia ma lelei ona faatino le latou galuega ia male le le malolo foi e saili auala e maua ai le ia latou tupe o le mea lea e avea ai foi ia lea Pulega o Uafu ma Taulaga e fai ma sui o lau sector atoa e avatu o matou dividend ile minisita o le MPE o le tulaga i Satitoa lea sa laga mai e tasi o sui ona o le le toe iai o se galuega a si toaina leoleo po lea sa iai o Satitoa e lei lavea o le tatou tulafono lea na fesui ai pulega nao Salelologa lava mo le fanua sa faia iai tulafono lenei ae leai se mea o le a faapopoleina

ai lau afioga i le sui mamalu o lea ua faagasolo nisi faatalanoaga ma se tasi o tatou lava kampani Samoa ile tulaga o le latou taumafai lea e lisiina Satitua ile latou atinae ma le tulaga foi lea o le tatou sleep way o lea faatalanoa poo lea se finagalo o le Komiti faafoe aemaise foi ia le afioga ile ofisa sili o le tatou pulega o le Aiga ile Tai ia lea ua sa avatu lava lau faamatalaga muamua ao faafofoga mai lo tatou atunuu ua iai le tatou fund ua fai mafai ona maua mai ai i lalo o le tatou Ministry le MWTI ia o lea ua tuuina atu ile tatou pulega o Uafu ma Taulaga e faatino ai le galuega lea o se uafu mo Aiga ile Tai e sili pea ou talanoa atu ia lau afioga ile sui fofoga fetalai o lea faafogafoga le tatou itumalo o lea ou te faalogologo atu o au foi a femisaai loa ona pau lava le faiga e fai ai ole tatou toe malolo ae sili o lea faafogafoga mai le mamalu o le tatou itumalo ile faamatalaga lenei , e leo manano ia Le Pulega o Uafu ma Taulaga e o atu e pule ile uafu pau a le mea lea avatu ai le fesoasoani a le Pulega o Uafu ma Taulaga o le o atu e faalelei le uafu aua ole taimi lenei o la e leo lelei lava le tulaga o le uafu o loo iai ao lea la avatu se uafu e pei ona ou talatalanoa atu ai ise taimi ua sola e faaoga ai lea uafu lea float sa o le Marina e talafeagai lenei ma outou ae aumaia la outou faatuatuaga o le fale lava ia faatali pasese a le tatou uafu lea i Aiga ile Tai o le mea lenae pule ai outou ae a faapea loa matou te faia e faia e le Pulega le toe faaloloto ma avatu se uafu ona aumai le laia aua e leai se tomai o le tatou itumalo e na te toe faia ai se maintenance ao lea la faaoga atu ia tatou pulega i tatou inisinia e faia le galuega lenei fesoasoani mo le tatou itumalo.

Ona tatou oo mai lea i mea ia o vaa meli laupasese, masalo ua outou silasila i ai mai lava i le tausaga na tea nei e le misi se masina i le tulaga o vaa meli laupasese e le i masani ona outou silasila i ai. Ae tasi lenei mafaua ma faiga foi ma metotia fou a le tatou faigamalo, lea ua mafua ai ona agai mai tatou meli nei. O le masina fou lau Afioaga i le Fofoga Fetalai, o lea o le a fetuunai le 6 meli laupasese e taunuu mai iinei i Samoa, e fetuunai ai taimi ma le tulaga o fuafuaga o le tatou uafu.

Ia, lau Afioaga i le Fofoga Fetalai, e tasi foi lea metotia, lea e fesoasoani i le 4.7% lea o le siitia i luga o le tatou tamaoiga ona o tupe maua i lea foi atinae o lo o faatino mai e le tatou Pulega o Uafu ma Taulaga. Aua e le natia ma e manino foi faatauga meataulima, ua matua fuli foi le tatou nuu e sui meataulima ma tulaga uma faapena, o faleaiga, o nai alo ma fanau faatauniu ua ou vaai ai i luga o le uafu, ia lea la na onono mai ai le mea foi lea ua faaturisi atoa ai e le au faatauniu ma tatou, ua tai \$10 i le niu vagana niu ia lapopoa faapea a le Afioaga i le Minisita o Faatoaga lea na faatusa atu.

Ae lau Afioaga i le Fofoga Fetalai, o le tasi lena o vaega, o pasi, taxi, scooters ma mea uma lava, ua maua uma tupe. Ioe. Ia, i le tulaga foi ia manino foi, o vaa nei a oo loa ina agai mai e fai mai le latou oka foi ia i tatou wholesalers i mea o meat o mea faapena, o fruits, o pea, o apu ia sa

saunoa i ai le sui usufono o le Vaimauga. O mea uma la na o lea e tapenapena, o alagatupe foi na a le tatou Malo lea ua maua i le taimi lea, talu ona fai nai suiga i tulaga o faiga faavae laitiiti a. E sao? Lea na i ai lava nai tamai faiga faavae ma nai metotia, a o lea ua matou o atu toe faalelei atili, lea la ua saputu mai ai vaa ia i le tulaga o le tatou uafu.

Tatou oo mai i le uafu lava, o lo o faagsolo le tulaga o le tatou galuega lea e faatino i tai i le harbor i le toe faaleleia atili o le tatou uafu ma le faatele, ia, e le o toe umi foi se taimi ae amata lea vaega. Ia ua tou molimauina foi i luga o le uafu i le taimi lenei i le anoano o containers ua faaoga le tatou uafu e store ai trans shipments mai isi atunuu, tasi lena alagatupe. Ia, ma o lea ua fuafua ai foi se galuega ma se poloketi fou e fausia ai le tatou uafu i Asau e avea ma tatou trans shipment board, ma standby mai ai i i e backup le tatou international boarder lea e tasi. Ae o le a faamoemoe atu lava i le tatou Ofisa o Tupe e saili se tatou fund e faatino ai le tulaga lea ma atili ai ona maua atu tupe ia matou e fai ai fuafuaga a le Ministry of Finance.

Tatou oo mai i le Pulega o le Suavai. Ia e tele foi nisi o finagalo sa talosagaina...

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai faamolemole pe maua se avanoa...

FOFOGA FETALAI: Malie lau Afioga i le Minisita se i fai sina malologa se i tuu atu i le sui usufono mo Aleipata Itupa i Luga.

Afioga Fuaava Suluimalo Amataga: Faafetai atu i lau Afioga mo le avanoa. Ia ua matau atu foi o lea o le a see ese, o lea ua see ese le Minisita i le tulaga o le Pulega o Uafu ma Taulaga. E momoli atu le agaga faafetai ua faamanino mai nisi o tulaga pei ona taua foi e lenei itumalo. Ae o le mea manino o lea ua taua e le i lava Aleipata i le tatou Tulafono i le fesuaiga lea na fetuunai ai le tatou Samoa Shipping ma le tatou vaega a le SPA. Ae pau le mea ua faateia ai au, aua o le toalua ea mai lou itumalo o le Itupa i Luga, e toalua foi mai le itumalo o le Itupa i Lalo o lo o galulue ai i le uafu lea i Satitoa. Ae ona o le taimi tonu lava lea ina ua pasia le tatou Tulafono lea, ma logo atu loa au ua leai ni latou galuega. Sa ou fesilisili i ai, a o le faaupuga, ia ua avatu, e o e malolo mai se i uma toe logo atu ia... ae o le popolega lea o lea foi ua tagisa mai o lea o le a ae aoga, a o le toatele o si afaigaluega lea, o lo o i ai alo ma fanau e fia aoga, aua leai se tulaga o se tupe maua. Sa taumafai foi e uunai i nisi o tulaga o tatou galuega faavaitaimi, a o lea foi ua o atu ua tapuni le faitotoa.

Ia pei o le tulaga lea a faapea mai lava lau Afioga ona o lea o le a i ai le kamupani e alu atu e faaoga le tatou slipway lea e i ai, ia a guarantee mai lava e lau Afioga i le Minisita ia o la e foi e faafofoga mai le Ofisa Sili o Pulega o le tatou SPA e toe maua ni galuega a nai ia foi uso ma tamalii o le

matou itumalo itupa i luga ma le fale foi i lalo, ia o le a talia ma le agaga faafetai aua lava le tausiga o aiga aemaise o nai alo ma fanau o lea o le a toe amatalia aoaoga, ua leai se mea e tua i ai. O lea foi ua tapuni mai le tatou RSE, ia omai e feosofi i le isi vaa lea pe maua se faaolataga.

Ia o le tatalo atu lea ma le agaga faaaloalo i lau Afioga i le Minisita, ae faafetai tele mo le faamaninoga o lea mataupu. Faafetai.

Afioga Niuava Eti L. Malolo (Vaisigano 1): Lau Afioga i le Fofoga Fetalai...

FOFOGA FETALAI: Ia malie lau... mo le faasaoina o le taimi o lau Afioga i le Minisita, se i tulai mai le sui usufono mamalu mo Vaisigano 1.

Afioga Niuava Eti L. Malolo: Ioe lau Afioga i le Fofoga Fetalai, o le sulusuluga lava o le agaga o le faafetai, ua faafofoga foi le itumalo ma matou maua i se faalogo. Faafetai tele i lau Afioga i le Minisita ua afea le uafu i Asau ua faalogologo foi le paia o le itumalo. Aua a fai le mea lea e manuia uma ai lava Savaii atoa. O le agaga lea o le faafetai i lau Afioga i le Minisita ona o lo o i ai pea le agaga ia aua foi le uafu. Faafetai tele, ia faamanuia le Atua i lau Afioga ma le tulai mai. Faafetai.

FOFOGA FETALAI: Ia, o le agaga lava o le faafetai. Lau Afoga i le Minisita.

Tofa Hon OLO FITI AFOA VAAI: Ia faafetai tele lava mo faafetai.

Ia, lau Afioga i le Fofoga Fetalai, tatou oo mai i le suavai, e tele foi nisi o finagalo sa faalaia i a latou suavai taumafa e toe fia faaleleia. Ae i le taimi nei lau Afioga i le Fofoga Fetalai, e tusa nei ma le 89% o le tatou atunuu ua i ai le coverage o le suavai. Ia, a o vai foi la lea, o le suavai mama o lo o faatino lea e le tatou Pulega o le Suavai, le suavai lea ua uma ona togafitia. So o se siama lava o lo o taelele ai i vai ia ua uma ona togafitia uma vai ia ua kava nei tusa ma le 89% o le atunuu. Ma o vai foi ia ua matua saogalemu i le fofoga taumafa. O isi pasene o lo o totoe o lo o kava mai i a tatou suavai foi ia vaitumaoti, lea e i ai tatou nuu ia e i ai tatou vaitumaoti. Ia o upu tuusao lava lau Afioga i le Fofoga Fetalai, ou te le gagana vale foi i le auaunaga a nisi o lo o faatinoa vaitumaoti nei, a o vai nei a tele mugala ua mate le suavai, a tetele foi timuga, ua palapala, vai ia o vaitumaoti nei. Ae le o mafai foi ona togafitia le suavai ina ia saogalemu le soifua maloloina o le mamalu o itumalo ma alaalfaga o lo o faaaogaina le suavai lea.

O lea la e avatu ai se talosaga, o la e o lo o faafogafoga mai lo tatou atunuu o lo o faaaogaina vaitumaoti, ia, lea ua ou valaau atu ma le agaga faaaloalo, agai mai i le vai o le ola, le vai lea a le SWA, e manuia ai outou

ma manuia ai lo tatou atunuu ma lelei ai le soifua maloloina, e leai se mai o le a oo atu ia te outou. Ia, e tatala pea le avanoa, so o se taimi lava o lea ua i ai nisi o alaafaga e tai pei o le afioaga o le tamaitai sui usufono i Manase, o lea foi ua talosaga mai ua fia agai i le vai lea. Faafetai. Ua silasila totoa foi i lenei vaega. E faapena foi nisi o alaafaga o Safata, lea ua faagaioi tulaga uma na e le tatou Pulega ina ia oo atu le suvai mama ua uma ona togafitia lelei ua leai se siama aua lo outou fofoga taumafa. I le...

Tofa Mauu Siasia Puepuemai (Vaa o Fonoti): Lau Afioaga i le Fofoga o le Fono...

FOFOGA FETALAI: Ia malie lau Afioaga i le Minisita se i tulai mai le sui usufono mo le Vaa o Fonoti.

Tofa Mauu Siasia Puepuemai: Faafetai e tusa ai foi o le avanoa lenei itumalo. E le o se faafetai, a o le faamalo.

FOFOGA FETALAI: O le uso lava o le faafetai o le faamalo a.

Tofa Mauu Siasia Puepuemai: O le agaga o le faamalo. O lea e faafogafoga mai si ou itumalo i le mea lava lea sa ou augani ai i le taimi sa taumafai mai le faiga palota. O le isi lea manulauti sa ou tuumumusu ai i le tele o afioaga. O le matou itumalo e tele ona peresona.

Muamua o le Vaa o Fonoti, lua o le Vaifagaloa. E leai se vai o se afioaga o lou itumalo o i le Malo. A o tulaga ia o lea e faafogafoga mai lou itumalo, o lea ua folasia le saunoaga malamalama e le Afioaga i le Minisita. A tetele timuga, ia o le popolega foi lea i le palapala o le suavai. Ae a oo foi ina mugala, o le popolega foi lea.

O le mea la lea e momoli atu ai lau faamalo tele lava. Le tatou itumalo, o lea ua ou outou faafogafoga o se faaoololomaau foi lea i la outou sui usufono. o fea o i ai la outou tofa, ia valuvalusia aa o le laau, to maia la outou pule, omai tatou vai i le Malo, o le upu moni, o le ao ma le po, e te maua a le suavai mama i taimi uma, aua lou soifua. Leaga a leai se vai, ua leai se ola. Ia, e pei o le toe tulai atu lea ma le agaga faaaloalo, ae momoli le faafetai tele e tusa ai foi ma le saunoaga matagofie a le Afioaga i le Minisita. Ma le faaaloalo.

FOFOGA FETALAI: Malo faafetai. Malie lava lau Afioaga i le Minisita se i toe tuu atu le avanoa i lesui usufono mo Falelatai ma Samatau. O se faafetai foi ma se faamalo?

Afioaga Lupematasila Galumalemana Tologata Togia Tile Leia (Falelatai ma Samatau): Lau Afioaga i leFofoga Fetalai, ia, o le faafetai

tele lava. E leai se agaga e fia faalavelave i le saunoaga matagofie a le Afioga i le Minisita, ae leaga o lea ua saunoa le Minisita i mea o vaitumaoti. Ae mo le silafia o le faaiuga o le tausaga lea na tea nei, na oo atu ai le talosaga a si ou pitonuu i Pata i Falelatai, ona o le tulaga la e ua i ai le suavai i si o matou pitonuu ua le lava le malosi o le vaitumaoti la e sa i ai i le taimi nei e sapalai ai Matautu ma Pata.

O le agaga la o le fesootai atu lau Afioga i le Minisita, ia atonu ai e le i fesootai atu le Pule Sili i lau Afioga, ae ua matua manaomia lava se fesoasoani i le taimi lenei ona ua utiuti le faaso aemaise foi o lea ua toe amata ona ae aoga a tamaiti aoga. Ia o le talosaga lea e tuu atu i lau Afioga i le Minisita. Ma le agaga faaaloalo.

FOFOGA FETALAI: Malo faafetai. Ia atonu o lea ua faafofoga mai lau Afioga i le Minisita, i lagona faatoa tupu ae o le sui usufono lea faatoa avatu ai le talosaga. Malie ia lau Afioga e talia maia le talosaga a le sui usufono.

Oi, se i tulai maia lau Afioga i le Minisita o Tupe.

Afioga Hon Mulipola Anarosa Ale Molioo (Minisita o Tupe): Lau Afioga i le Fofoga Fetalai, e leai lava se manatu e faalavelave i le folasaga matagofie a le Afioga i le Minisita, ae tulai lava ma le agaga faaaloalo, atonu o lea foi e faafofoga mai si ou itumalo, si o matou nuu i Salailua ma Siutu, o lo o i ai foi i le vaitumaoti. Ua uma foi ona faamita matou vai, a matou nuu ia e lua o Salailua ma Siutu. Peitai ane o lou popolega, ia atonu o lea ua saunoa le Afioga i le Minisita, e le mama le vai pe a o i le taimi o timuga, ma ou te popole foi i le soifua maloloina o lou itumalo.

A o le tatalo ma le talosaga i lau Afioga i le Minisita, po o le a sou finagalo, o lea ua maea ona faamita, ae tatalo atu, pe le ono faatino se fesoasoani a le Ofisa o le Vai e omai e faatino le latou galuega fesoasoani e faamama le vai.

Na pau lava lena o le auaunaga ina ia mafai ai ona soifua maloloina le matou itumalo, aemaise foi isi itumalo o lea e matau atu o lea foi e soifua laulelei i le vai tumaoti.

O le talosaga lena ma le faamanuia i lau Afioga. Ma le faaaloalo.

FOFOGA FETALAI: Ia, manaia o lea foi ua ofi mai le talosaga a le Minisita o Tupe i lau Afioga. Ia, tulai mai lau Afioga.

Tofa Hon OLO FITI AFOA VAAI: Faafetai. Ia faapea foi e le o lavea ai ma le Minisita o Tupe i i lea mea. Faafetai i le tulaga o mataupu ua laga i a outou Afioga i sui usufono. Ia e pei lava ona ou fai atu, o le aso Faraile nei e alu atu ai le matou asiasiga taamilo i Tumua nei, a o le vaiaso fou o le

a matou taamilo ai i Salafai. O le a matou taunuu atu, o le a asia uma lava tulaga o vai ia, ona avatu lea o se fautuaga i a outou afioaga ma alaalfaga.

I le tulaga o le vai lea pei ona saunoa le Afioga i le Minisita o Tupe, ia, e matautia foi lo outou maemaea ma le faamita o tou vai ma le tulaga uma na. Ae le o aapa lava le pulega i le tatou Tulafono. E silafia lelei lava e le sui usufono mo Aleipata Itupa i Luga, o lea ua taoto le tatou Tulafono i lalo o le tatou water sector i le Tulafono lena e pulea ai e le Malo vaitafe uma lava ma so o se punavai. Ae le o aapa lava le Malo e faaoga le malosiaga o le Tulafono lena, ona o lea e i ai le tofa ma le uta i sui usufono ma taitai o le tatou atunuu. Ia na ona ou faapena atu, na ona ou logologo puialii atu i le faataua o le soifua maloloina lea na saunoa ai le Minisita o le Soifua Maloloina. Afai la ae tulai mai se tulaga faaletonu i lea alaalfaga ma lea alaalfaga ona o le suavai lea, ia o lea ua ou talanoa i totonu i i e faamauina lau faamatalaga lena, ina ne i tuuaia le pulega ma le tatou faigamalo.

Lau Afioga i le Fofoga Fetalai, e mafua foi ona ou talanoa i le tulaga lea i le suavai lena, ona o le tausaga lea ua tea sa faamauina ai le utiuti o le suavai maua o lo o toa i le manava o le eleele. O le tele ia o tulaga o vaitafe ua mamate tafega, ae oo foi la i vaitoa foi ia i lalo o le manava o le eleele, ua faapena foi ona tuutiitia. O lea la o lo o taumafai pea le galuega a le tatou Pulega o le Suavai e faatino pea ma saili ni vaipanoa e vili ai a tatou poreholes ina ia mafai ona fesoasoani i se taimi o muamua e utiuti ai le suavai.

Ae avea foi lena taimi e avatu ai se talosaga ma se ... i le tulaga i le pule mamalu a alii ma faipule, se i silasila foi i le taina o le vaomatua. E tasi lena o vaega e pei foi ona ou talanoa atu i le sui usufono mamalu o Vaimauga, o le mafuaaga tonu lena o lo o fai ai ma palapala le tatou suavai tumaoti lena, ona ua tele ina faatoa tulaga ia. E taua foi faatoaga, a ia silasila totoa foi i le aoga o le tulaga lea i le tatou suavai, aua o le tele o tatou water catchments areas ia ua tele ina faaleagaina. O uta i ina i Vaialele o lo o tele foi le... i ina, e tatau foi ona tatou puipui i le tulaga lena o lo o harvest ai le tatou suavai.

FOFOGA FETALAI: Malie lau Afioga i le Minisita ia e taua tele lava mea ua oo i ai lau saunoaga, ia ona o lea foi ua matau atu ua toe lagalaga ai finagalo o nisi e le i lauga ai ona o le taua tele o le mea lea ua oo i ai lau saunoaga, ma e le vaoia foi e le Nofoa, ona o mea e taua, o mea e aoga i afioaga ma nuu, ae ua i ai le manatu e toe faaauau lau saunoaga pe a tatou talii mai.

O lea ua pasia le tatou lafo tatou te toe fonu i le 2. O lea foi ua tapena le tatou taumafataga e fua foi i lo outou malolosi mai le 2 e tau i le 6. Ma ua tapu foi i i tatou faanoi i le 2 tau i le 6 seia uma le tatou galuega o lea ua pasia le tatou lafo. Ia malilie e onosai mai tatou galulue, e tele foi tatou feau ma galuega ma tuatuaia ae manatu tele i le taua o le tatou fonontaga

lenei. O lea ou te talosaga atu ai ma le agaga faaaloalo. Faataatiaese le tatou Galuega, tatou toe amata i le ta o le 2.

Na faataatiaese Taulumaga a le Fono Aoaio Faitulafono i le itula e 1:02 i le afiafi.